

14
5
ERNESTI BENSHEIM

Philos. & Medicinæ Doctoris & Practici
Polono - Fraustadiensis

TRACTATUS

DE

HYDROPE,

In quo simul ostenditur vera veri
Medici cognitio,

&

Quinam Medici in curandis morbis & ad officia
archiatrica admittendi, quinam vero
rejiciendi;

Omnia brevissimè descripta.

Cum Licentia Facultat. Med. Lips.



L I P S I Æ,

Typis JOH. CHRISTOPH. BRANDENBURGERI.

ANNO M DC LXXXIX.

CELSISSIMO, ILLUSTRISSIMO
ET REVERENDISSIMO

Principi ac Domino,
DN.

STANISLAO

in Lubraniec Dambski, DEI & Apo-
stolicæ Sedis Gratiâ Episcopo Vladislaviensi &
Pomeraniæ, Nominato autem Cracoviensi
ac Ducî Severiæ &c.

Domino & Principi Meo Cle-
mentissimo, &c.

Celsissime ac Reverendisime Episcopo,



Audes summa cum delectatione lego,
quas FRANCISCUS CITESIUS olim Medi-
cus famigeratissimus Regis Christianis-
simi & Cardinalis Ducis de RICHELIEU
Intimi Illius Regis Ministri huic Cardinali in De-
dicatione suorum Opusculorum Medicorum im-
ponit, sic scribens: Medicos veros adesse jubet,
qui morbis profligandis apta præscribant: Chirur-
gos & Pharmacopœos, qui manum & medica-
menta admoveant: Patres $\pi\lambda\omega\nu\sigma\tau\epsilon\rho\phi\omicron\varsigma$, qui vi-
ctum ministrent, & Quæstores, qui sumptibus
necessariis operam dent, Verum est, si quid in

Re

Republ. quadam Augustissima necessarium ac laudabile, certa & bona dispositio in rebus medicis & constitutio ubique bonorum Doctorum & verorum Medicorum; ne ex aliorum Pseudo-Medico-
rum, Medicastrorumque copia plures hominum occiderentur quam in castris & præliis.

CELSISSIME PRINCEPS, me non peccare puto, si id, quod de Cardinali RICHELIEU in tota Gallia adeo laudatur, quoque de TE dicam. Quis enim dubitat à CELSISSIMA TUÆ REVERENTIA illa non expectanda esse, si modo Status & Conditio Reip. Polon. hoc permetteret. Magnus enim Amator ac Meccenas Literatorum summa cum laude audire vales. Humanitas in tali magno Principe major est, quam ut fat verbis exprimi possit. Quæ & in me hanc audaciam excitavit, tractatulo huic de Hydrope morbo gravissimo & in Polonia non rarò grassante quamvis compendioso CELSISSIMÆ REVERENTIÆ TUÆ Nomen præfigere, eumque una mecum in Patrocinium & Gratiam CELSISSIMÆ TUÆ REVERENTIÆ recom-
mendare, sperando eum non ingratum fore.

Accipe igitur manu benevola, serenoque vultu
respice munusculum hoc papyraceum, PRIN-
CEPS CELSISSIME submissè venerande, au-
thoritatisque Tuæ splendore irradiare ne dedigne-
ris. Vale, diutissime, felicissimeque vive inco-
lumis.

Celsissimæ Tuæ Reverentiæ

Lipsiæ Calendis
Octobris 1699.

*Observantissimus, Obsequen-
tissimus*

ERNESTUS BENSHEIM,
Doct.

Candido Lectori.

Non esset, Candide ac Benevole Lector, ut rationes, quæ me ad hunc tractatum scribendum commoverint, prolixè recenseam. Tamen quin multi de causa hujus solliciti fuerint, nullum dubium, dico cum me non lucri aut famæ aucupio, nec philantia aut jactantia causa, quæ longè à me proscripsi, sed animi recreationis ergo scripsisse ac publicæ luci commisisse, & quidem primum, ut me in medica arte omnium jucundissima exercerem: dicente Cicerone, Quam Quisque novit artem, in hac se exerceat. Et vitium capiunt, ni moveantur aqua. Et ut cogitationes & observationes meas, quas supra hunc morbum gravissimum habui, aliis quoque communicarem. Deinde altera & potior ratio est, nempe ut illi Calumniatores, Mendaces, Nugatores & Nequissimi Sycophantæ futilem loquacitatem cum vanis proferentes: Me Medicinam perfunctoriè tantum fecisse, nec artem verè attigisse; ex hoc tractatulo discant, me medicam artem ex ipsis fontibus hausisse, illamque totam à pueritiâ, imo ab infantia in locis debitis & studiis medicis sacratis, studio, industria & labore, atque per debitum tempus tractasse, excoluisse & curasse.

Verum quidem est, nos ea tempora vivere, quibus Medicina artium aliàs omnium præclarissima & nobilissima præ illis medicis fictis, qui eam exercent, & nomine & fama magni sunt, & propter illorum ignorantiam, inter quos, quod dolendum, etiam Juris-periti modò reperiuntur, qui temèrè hos ipsos judicant, nunc omnium artium propè infima censetur. Sed nulla alia causa est, quam quod Medicinæ nulla pœna in Republ. statuta sit, imo interdum ipse Magistratus tales fictos medicos hinc inde alat. Insuper non rarò accidit, quod ejuscemodi impii & imperiti nebulones variis in locis à primariis Reip. Proceribus non solum aliis peritis, doctisque Medicis anteponantur, sed eo quidem interdum etiam res devenit, ut ii infimi Scioli, qui Paracelsi aliorumque Chymicorum libros vix extremis, quod a-

junt,

junt, labiis degustarunt, multo minus legerunt, garrulitate atque mendaciis suis viros primarios eo usque deducant, ut non modo illos approbent, laudent, verum etiam inter consortium honestissimum recipiant, & sic in altum extollant.

Sed vercor, ne Illi Primates, qui, quamvis Illis jure Medicina, tanquam unum ex summis beneficiis ac donis, mortalibus à Deo O. M. in hac miseriarum valle concessis, magis colenda ac suspicienda esset, eam etiam interdum cum aliis passim pedibus conculcant & vilipendunt, dum tales homines patiuntur, qui hujus sive scientiæ sive artis nobilissimæ nullis gaudent testimoniis, neque privilegiis, tandem aliquando à Summo Oecono-
miam vestram imposterum administrare non potestis, atque ita vinetum suum multis in locis deinceps aliis vinitoribus, quod tamen Deus clementer avertere velit! locarit, colendumque tradiderit.

Exemplum cujusdam Medicastris famosisimi, qui nec studii sui testimonia, nec universitatis alicujus praxis licitæ privilegia ostendere potest, tamen adeò audax præ me locum desiderare physicum mihi ivit obvium. Medicastrum hunc cujusdam illustrisissimi Domini placitu atque desiderio circa curam speciei hydropis Tympanitis scil. cum Ascite admisi: sed probo dolor! quanta ignorantia, quanta in re medica inscitia sequentes testabuntur paginae.

Et hoc etiam maximè ansam dedit huncce tractatulum luci publicæ committere. Candidus ac benevolus Lector omnia benignè interpretetur, & si fortè omnia ad palatum suum non pertractata sint, æquo animo ferre velit, impolito stylo ignosceret, volubili enim manu scriptus est tractatulus, præsertim cum magis ad rem, quam ad verba animum meum intenderim, siquidem juxta Celsum morbi non eloquentia, sed remediis curentur, & non omnes esse possimus Cicerones. Sed sufficit; ipsam aggrediar materiam.

Tractatus de Hydrope.

Inter innumeros ferè morbos, quibus Microcosmus seu parvus Mundus hominem intelligo afficitur, Cataclysmos, inundatio aquarum seu Hydrops non minimus est, sed gravissimis suis invasionibus hominem tandem nisi maturè ei succuratur, in perniciem, h. e. ipsam mortem ultimam lineam rerum præcipitat. Cujus exempla passim in omnibus ferè regionibus, nostris præsertim abundè satis prostant. Nos hujus gravissimi morbi integram naturam curamque paucis in gratiam illorum hoc morbo laborantium, ei que medentium, describere suscepimus.

Ad rei cognitionem tria spectare, scil. definitionem, divisionem & demonstrationem Logici ajunt. Horum vestigia ut moris est premere & nos initium de definitione faciamus.

Generale autem nomen suum deducit è Græco, & dicitur Hydrops, quod postea quoque apud Latinos retinuit. Non male verò derivari potest Hydrops ab ὕδωρ quod Græcis significat aquam, & ὄψ, quod vocabulum significat Filiam Oceani, qui magnus est confluxus aquarum, & magnum & universum mare appellatur, quod universam circuit terram; & Tethyos, quem Poëtæ maris Deum efficiunt. *Plato in Timæo & Virgil. 4. Georg.* ὄψ etiam Πεῖα dicitur ἀπὸ τῆς ῥῆσιν, quod est fluere: propterea quod terræ rebus omnibus affluat, quasi exprimeres conjunctis vocabulis ὕδωρ ὄψ Πεῖα, h. e. Aqua copiosè conflua: Aqua enim serosa in hominibus hoc morbo laborantibus copiosè ruptis ex inundatione aggeribus in ventrem confluit. Potest & ab antiquo nomine *ops*, quo veteres pro divite utebantur, desumi: Hydropici enim divites sunt aquarum serosarum & acrium in corpore. ὄψ quoque significat faciem, vultum, oculum &c. in hydrope vel infimus venter, vel totum corpus, vel facies, vel oculus referunt vultum, aspectum aquosum. Præterea ὄψ à

Poëtis fingitur esse soror & uxor Saturni, *Hesiod. in Theog.* Qui Planeta frigidissimæ est naturæ & omnia obstruit suo frigore: Hoc experiuntur Hydropici, qui quandoque nunquam, aliquando vix & summa cum difficultate, multoque negotio ad sudandum ob copiam aquarum in corpore contentarum omnes circumjacentium partium poros obstruentium disponi possunt.

Ἵδρωψ commodioris elocutionis gratia per ἑλλεψω pronunciatur ὕδρωψ abjecto in ὕδρω ω. & sic in Genitivo reliquisque casibus tribus syllabis constantibus penultimam producit, quia ω. scribitur, quæ litera apud Græcos producitur, non ο. omicron: & sic hydrōps, hydrōpis penultima longa, non hydrōpis penultima brevi pronunciatur, uti Nostro Medicaastro, quem Physicum sui Amici per civitatem divulgare non erubescunt placuit, dicenti: Ego in hydrōpe bona habeo arcana. Sed profectō Amici Illi hujus socii agunt contra ipsum Deum; contra justitiam peculiariter distributivam; & contra omnes leges. Contra Deum, qui vult ut illi Medici honorentur, qui ab eo vocati sunt. Contra justitiam: Quæ jubet ut cuique suum tribuatur; suum autem cuique non tribuens ipsa injustitia est, qua familiam ducente, fieri non potest, quin tandem omnia collabantur. Unde *Aristot. 2. de Republ. c. 9.* Qua in Republica non virtuti optimus habetur honor, in ea optimus civitatis status, firmus ac stabilis esse non potest. Contra leges: quæ præcipiunt, ut honores legitimis modis acquirantur: non vi, non fraude, non crudelitate, non largitionibus, non calumniis ac obtreptione aliorum.

Hydrops nonnullis vocatur Hydropisis, Latinis quoque Aqua intercus, quod inter cutem aqua colligatur, qua corpus turgescit. *Horat. l. 2. Carm.* Crescit indulgens sibi durus hydrops:

Nec sitim pellit, nisi causa morbi

Fugerit venis, & aquosus albo

Corpore languor

Celso Morbus Hydropicus. Gorræo ὕδρω. Paracelsus rorem humidum seu resolutum salem seu liquorem ad differentiam aquæ simplicis usualis vocitat. Absyrto ὕδρωπλασις καὶ παρὲν χυσις. A. Q. sereno Sammonico languor aquosus, & lymphaticus error vocatur. Σουενδοχινῶς Græci partem pro toto sumentes etiam per ὕδρω & ὕδατα hydropem significant.

In genere denotat colluviem serosam, cujus inundatio si fit in abdomine, hydrops Ascites; si simul flatus in abdomine adsint, Tympanitas; si in habitu corporis universo, Anasarca; In Capite, Hydrocephalus; in Pectore, Hydrops pectoris; in scroto, Hernia aquosa, Hydrocele; in utero, Hydrops uteri nuncupatur.

Hinc Hydrops non male definitur κατὰ κλυσμούς Μικροκόσμου; Nam quod in Macrocosmo mundo hoc aspectabili est diluvium, hoc in Microcosmo inundatio aquarum serosarum, acrium, acidarum. Plerumque enim Illi, qui computationibus diurnis nocturnis sese adstringunt, item Messores tempore Messis nimium frigidarum ingerentes, unico verbo Potatores præ aliis hoc morbo afficiuntur, vexantur.

Diluvia Macrocosmica præeunt nimbi ingentes, qui fluvios, flumina, rivos, torrentes &c. collectis aquis adeo implent, ut non solum præ quantitate tantarum aquarum collectarum eas capere non possint, verum etiam perruptis aggeribus è limitibus suis dimittere cogantur, quæ deinceps omnia circumjacentia loca, prata, agros, & in his sata, integras civitates, pagos &c. inundant, destruunt, & ita aliquando pervertunt, ut vix quandoque videre liceat eorum rudera.

Testatur hoc nuper elapsus annus millesimus sexcentessimus nonagesimus octavus, qui singulis ferè mensibus ingentes & stupendas aquarum hinc inde peperit inundationes, quæ variis gentibus magnæ jacturæ, magno detrimento & damno, multisque hominibus exitio fuerunt, præsertim in Germania, ubi è variis locis maximè verò è Belgio de magnis inundationibus Novellis insertis nobis relationes sat patent. Ipsa illa Posnania in nostrâ Poloniâ caret lingvis, quibus sat exprimere possit eam tristem miseriam & miserrimam tristitiam, quam passa est ex illa inundatione præterito anno exantlata.

Quemadmodum nunc in Macrocosmo ex prægressis nimbis ingentibus κατὰ κλυσμούς seu diluvium necessariò sequitur, ita & in Microcosmo ex præmissis nimis vinorum, cerevisiarum, spirituum arte pharmaceutica paratorum, aquarum vitæ, item simplicium aquarum imbribus necessariò sequi oportet inundationem aquarum seu hydropem. Sicuti in Terra factis nimis pluviis aquæ hinc inde confluunt, confluentes colliguntur & adaugentur; sic in homine ingestis nimis potulentis aquæ passim modo in hac, modo in illa corporis humani parte confluunt, colliguntur,

guntur, putrescunt, acescunt. Uti in Mundo magno hoc aspectabili aquæ collectæ cum impetu in Fluvios, flumina, rivales, rivulos &c. irruunt, eaqve præter modum complent, & ob quantitatem tantarum aquarum illorum aggeres perrumpunt. Simile quid fit in parvo mundo, ubi aquæ collectæ restagnant, restagnantes à tergo sequentibus cumulatæ in fluvios, rivales &c. qui sunt vasa lymphatica majora & minora ingruunt adeoque distendunt, ut præ quantitate illarum collectarum aquarum vasa lymphatica dirumpantur & dilacerentur. In Macrocosmo diluvia omnia post se destructa relinquunt, prata, agros, civitates, pagos &c. pervertunt, & in statum miserrimum ponunt; Idem accidit Microcosmo, in quo aquæ extravasatæ & per catarractas non eductæ omnes circumjacentes partes in Ascite præsertim adeo destruunt, pervertunt, in substantiam gangrænosam permutant, ut non solum illæ partes in ruinam præcipitentur, sed etiam integer hujus mundi parvi tractus prosternatur, ut non pauci hujusmodi mundi ab ejusmodi diluviis ad libitinam ultimum valete transmissi sint.

Varia autem sunt diluvia in Macrocosmo, pro varietate nimborum, qui nunc vehementiores, nunc benigniores sunt, & quandoque magnos regionum tractus inundant, quandoque quoque parvos; semel tamen duntaxat totum Universum in perniciem præcipitaverunt. Sic etiam in Microcosmo pro conditione & diversitate influxus aquarum serosarum in corpus humanum nunc hæc, nunc illa species hydropis producitur.

Definiatur ergo Hydrops consummatus, quod sit diluvium microcosmi nunc majus, nunc minus, factum à diruptione vasorum lymphaticorum ruptorum ex nimia distensione facta ex collectione colluviei serosæ, modo totum corpus, modo infimum ventrem, modo partes aliquas corporis inundans, tumorem produciens partium inundatarum vitalitatem extinguens, & pro conditione morbi Microcosmum ad Orcum mittens. Et hæc definitio quoque correspondet derivationi Nominis sui, quod ab ὕδωρ, Aqua, & Ὠψ, quæ & Πεία dicitur, Filia Oceani, cujus ingens aquarum confluxus nemini non, nisi qui ejus limina non salutavit patet, derivatur.

Qui per collectionem præternaturalem lymphæ serosioris definiunt, hoc de incipiente morbo intelligunt; nam uti in Macrocosmo, antequam ναυακλυσμός subsequatur, præcedit collectio aquarum, sic in Microcosmo

cosmo colluvies serosa, sit in quacunqve parte velit, priusquam sequitur inundatio, colligitur. Et pro causa mediata proxima merito haberi potest, nam mediante aquarum collectione diluvium.

Alii per Tumorem Corporis vel partis ejus præter naturam definiunt, exortum ab humoris aquosi & serosi vel flatus collectione. Quæ definitio legi potest apud Hippocratem L. 4. de morbis, text. 33. & 34. pag. 158. Et hæc definitio valet ratione conformationis, quia miseri hoc morbo afflicti in magnam quantitatem accrescunt, augescunt. Quapropter etiam ab illustribus Medicis Patavinis hic morbus definitur: quod sit aucta magnitudo præter naturam totius habitus corporis aut ventris proveniens ex cachectica & labefactata virtute sangvifica.

Antequam autem progrediamur, & de singulis speciebus subjectum indicemus, præponenda sunt quædam generaliora de structura Corporis humani, ut eo felicius & certius in curandis hisce morbis simus, & quamvis mihi non incognitum illud Medici omnium seculorum judicio sapientissimi optimiqve, Hippocratis scilicet dictum, qui in libro de prisca medicina hæc habet. Medici quidam & Sophistæ dicunt, quod impossibile est eum medicinam cognoscere, qui non novit, quid sit homo, & quomodo primum factus & compactus sit. Ego vero ea, quæ ab aliquo Sophistâ aut Medico de natura dicta, aut scripta sunt, minus censeo ad artem medicam spectare, quàm ad Pictoriam.

Attamen (ne vel divinus hic Author erroris ullatenus insimuletur, vel ex hoc Empirici veteres Illi sic dicti Practici ignorantia suæ patrocinium quarant. Nam profectò Virum tantum tamqve sapientem nullo modo potuit latere, humanam omnem investigationem ultra generalem Naturæ & Anatomia notitiam pertingere non posse) apertè dico, divinum Autorem hic non loqui, de veræ Scientiæ naturæ indagatoribus, sed de iis Sophistis & Pseudo-Philosophis, qui sibi magnam, eamqve imaginariam & falsam Naturæ scientiam fingunt, & si rectè memoriâ teneo, memini me legisse Galenum etiam de hujus generis Sophistis mentionem facere, *Class. 5. lib. 2. de facult. simplicium medicamentorum*; Nec generalem fabricæ humani corporis notitiam carpere ac fugillare, sed potius caveri in prædicto loco voluisse, ne homines præcipuam in cadaverum affectione locarent operam, relictis aliis magis ad medicam artem necessariis scientiis. Et me, quantum attentissima cogitatione, eaqve ad Pra-

xin (quæ Medicinam profitemrium Lapis Lydius haberi debet) relatâ asse-
qui valeam, utcunque existimare, quod necesse omnino sit, ut Medicus
structuram humani corporis probè calleat, quo rectius veras ideas & na-
turæ, & causarum quorundam morborum animo concipere ac formare
queat, ne illis Empiricis & imaginatoria eaqve falsa scientia edoctis,
& neglecto legitimo ordine ad culmen seu gradum Doctoris ducente, sola
saltem ex sua falsa scientia à Notario quodam in Drepana urbe illa Regio-
nes Lyciæ il lege, habitante (quæ quidem historiala multis erit ridicula,
tamen verissima: Cùm ille Notarius sibi ipsi auctoritatem adscripserit &
sumpserit pro suo placitu Doctores medicinæ creare, eosque aliis juxta or-
dinem & auctoritatem Academiæ creatis Doctoribus præferre) divul-
gatis Doctoribus stupidis quidem stolidisque pari passu ambulet, & meri-
tò damnationem potius quam laudem subeat. Nihilominus tamen omnis
terra ejusmodi alit empiricos, quorum magna in curandis morbis, quo-
rum causas tamen ignorant, est præsumptio.

Primum autem membrum, quod in hydrope læditur, est ventriculus,
ex cujus læsione omnes ferè morbi interni ortum suum ducunt, qui in-
star ollæ vel cucurbitæ seu retortæ est, & cum integro suo canali ex tribus
membranis componitur, glandulosa, carnosæ & tendinosa, quæ omnes
sua habent officia: Nam glandulosa duobus præcipuè infervit usibus, pri-
mus est, ut sensibilitatem det, & ex hac sensibilitate appetitum in nobis
excitet, qui sub nomine famis & sitis provenit, nempe quando cibi reliquiæ
vacuo in ventriculo hinc inde oberrantes, mora & agitatione acriores fa-
ctæ superius ventriculi orificium ex fibrillis nerveis contextum vellicant,
& quia nervi ventriculi cum reliquis nervis in sensorio communi seu *noxa-*
cio terminantur, efficit hæc vellicatio, ut mens ideam famis & sitis conci-
piat, atque de cibo & potu sumendo cogitet. Secundus usus est, ut ad
hunc appetitum excitandum, & circumjacentes partes humectandas glan-
dularum suarum beneficio succum quendam salivalem secernat.

Carnosæ ob suas longitudinales, circulares & obliquas fibras pera-
git motus diversos, & ventriculum ad sumenda & coquenda alimenta mo-
do capaciores, modo verò ad eadem in chylum convertenda, chylum per
debitas vias transmittendum angustiores efficit; qui quidem motus omnes
beneficio sp. animalium perficiuntur.

Tendinosa impedit, ne reliquæ sese nimitum dilatare valeant. Præter has membranas reperiuntur etiam in ventriculo Nervi à pari octavo, duo insignes funiculi stomachici dicti, Arteriæ ab Arteriæ magnæ ramo cœliaco, Vênæ à portæ trunco, quarum diversæ ramificationes per anastomoses invicem omnes junguntur, nec non vasa lymphatica ab infinito ferè glandularum numero orta. Quæ vasa plerumqve cum omento habent communionem. Cum quo & ventriculus suo fundo connectitur.

Quapropter etiam Omentum quandoqve secundum membrum in hydrope læsum æquissimo accusari poterit; connectitur enim ut diximus superiori parte cum fundo ventriculi, inferioribus autem partibus adhærescit lieni, jecori, pancreati atqve intestino colo & consequentur renibus, vasibus cum ventriculo eisdem ferè, arteriis à cœliaca venientibus, venis in portam desinentibus, nervis ab octavo pari, & vasibus lymphaticis gaudet, & quidem magnâ & ingenti copiâ.

Intestina quoqve non excludi possunt; in quibus simul occurrunt ductus pancreaticus, choledochus & vasa lactea, quæ omnia summè necessaria sunt ad negotium in corpore nostro expediendum.

Omniū autem ventriculus primum se prodit, in quem omnes per fauces, gulam & œsophagum transmissi imbres ruunt, quapropter etiam facile ejus *ἀσυνία* variis modis potest debilitari: nunc per nimiam frigidorum ingestionem, ut Messoribus aliquando tempore messis in magno æstu contingere solet; nunc per aliorum e. g. Vini, Cerevisiæ &c. potulentorum nimiam repletionem, ita ut in Homine certe hoc à nimis ingestis contingat, quod in Mundo ab ingentibus imbribus fieri solet. Nimia enim potulenta, præsertim si visceribus æstuantibus ingerantur, calorem naturalem destruiunt & depauperant, viscera obstruunt & inflammant; hinc ventriculus primò afficitur, flaccidus & ineptus ad ulteriorem concoctionem redditur. Nota: concoctionem in ventriculo non ex specifico suo quodam calore institui posse; sed ex fermento sanguinis quod per glandulas suas suppeditat, chylicationis negotium promovetur.

Vigore ventriculi extincto assumpta alimenta non ritè concoquuntur, sed in liquamen viscidum, ferosum, glutinosum & acre & acidum loco boni chymi pervertuntur, quod ad intestina ductum per vasa lactea ad receptaculum chyli, cisternam chyliferam dictum & ex hac per ductum thoracicum ad ipsum Cor transfertur. In statu naturali & sano omnia hæc

hæc negotia pro voto expediuntur. Succus enim chylosus per vasa lactea ad receptaculum chyli translata, ex hoc per ductum thoracicum ad cor tendens, paulo ante cor sanguini per axillarem redeunti & lymphæ à partibus superioribus refluenti sive descendenti confunditur. Hæc sic confusa per venam cavam dextro Cordis ventriculo infunduntur, ut ibidem prævia rarefactione magis magisque attenuentur, atque accuratius etiam secundum minima misceantur. E dextro Cordis ventriculo sanguis per motum Diastolen dictum promovetur per arteriam pulmonalem ad pulmones, ob quos etiam solos dexter ventriculus Cordi appensus est, & propriè non meretur cor dici, quia illa quoque animalia, quæ pulmonibus carent, dextro quoque cordis ventriculo carent, & rescisso utcumque cor pyramidalem suam figuram obtinet. In pulmonibus massa hæc sanguinea majorem subit ventilationem, & ex his motu systole dicto per venam pulmonalem in sinistram Cordis thalamum, qui propriè cor dici meretur, impellitur; in hoc thalamo majorem subit rarefactionem, & ex hoc ventriculo per eundem motum Diastolen per Aortam Arteriarum Truncum generalem omnibus partibus corporis sanguis communicatur, & consequenter ipsi ventriculo.

E quibus facile colligi potest, quomodo in statu præternaturali & morbofo partes corporis humani hinc inde lædi possunt, omnia enim liquida in circulum gyrantur; quod si nunc ventriculus eclipsin patiatur & chylus non ritè & debitè in illo præparetur, facillimè reliquæ partes infici possunt, quæ postea sanguinem non uti debent fieri depurant, sed redeunte sanguine ad ventriculum malè disposito, fermentum ejus magis magisque inquinatur, heterogeneis particulis permiscetur, & sic totus Tonus Ventriculi extinguitur. Qualis enim cibus & potus, talis chylus; Qualis chylus, talis sanguis, tales spiritus; Qualis sanguis, talis liquor gastricus, h. e. fermentum ventriculi; Qualis liquor gastricus, talis iterum chylus &c. hæc enim semper redeunt in circulum, seque mutuò vel conservant vel destruunt.

Hinc patet quomodo ex liquamine hoc viscido, seroso, acri & acido passim in partibus nostri corporis obstructions generari possunt, præsertim in glandulis mesenterii in hydrope, quæ ex intestinis per vasa lymphatica chylum recipiunt, eumque spirituosum faciunt, magis fluidum, magisque activum reddunt. Quando autem chylus crassus, nimis & spissus est,

est, hæ glandulæ facilè obstruuntur, & successu temporis quoque indurantur, sed ut illi à vulgo sic dicto Practico veteri, ficto autem medico iterum placuit, illas glandulas in hydrope, præsertim tympanite in corpore flatibus expanso externè digitis tangi posse, dicenti: *Sie fühlen doch hier auff dieser und der andern Seiten / man kan die Glandulas mesenterii induratas recht mit den Fingern fühlen und greiffen* / hoc absolutè nego, & pro fraude magis, quam veritate habeo. Simplicissimus enim, ille ex fallaci de Personâ meâ sumpta opinione, quam ab aliis meis inimicis fraudulentis ceperat, verba hæc simplicia & ficta mihi pro veris venditare volebat, credebat enim me esse pharmacopœum, non Medicum; hæc autem opinio hunc socium stupende fallebat, audiebat enim ex ore meo: vestra Dominatio errat, sunt excrementa dura in intestino colo remorantia, quæ ob inopiam motus intestini peristaltici ejici nequeunt; quod etiam eventus affirmavit; nam applicato à me præscripto clystere & habita sede excrementa durissima & globosa excreta sunt, illæque glandulæ mesenterii induratæ amplius quoque poterant nec observari, nec digitis tangi. Et ab illo tempore Medicum hunc semper impostorem, non verum Medicum esse judicavi, quam opinionem alii quoque Medici confirmaverunt, & quorum relationes de hoc Medico lubens credo.

Ex Relatis enim patet hujus hominis ignorantia & inscitia in Anatomia & consequenter in Medicina; & quicumque leviter tantum Anatomen percurrit, longè aliter de conditione & situ mesenterii in corpore humano judicabit, quam hic medicus. Hoc non negandum, ut supra dixi, glandulas mesenterii obstrui posse, obstructas indurari, verum eas in abdomine flatibus & aquis distento tangere digitis, & oculis percipere, falsum est, & non concedendum.

Diximus supra Omentum quandoque secundum posse esse membrum, quod in hydropicis læditur. Quod probatur propriis experimentis: Observatum enim est Messores citò & per paucos dies incidere in hydropem; Patet Infantes per Adipphagiam scil. nimiam lactis suctionem magnam urinæ quantitatem excernere, & quandoque quoque citò hydropicos fieri; Observavi in Civitate Neostadio ad Hartam (in qua primam praxis meæ feci periclitationem, eamque adeo feliciter, ut, nisi bellum hoc impedivisset, adhuc ibidem degerem sat contentus utinam) in fabro quodam ferrario circa modo dictam civitatem habitante, ab hernia omentali

sectione liberato, hunc ægrum sanatum illo tempore, quia magna pars omenti simul excissa fuerat, de urinæ difficultate maximè conqueri, & si nimium potulentorum assumpisset, magnum circa ventriculum sentire dolorem, & semper ferè alvum laxam habere; Observavi illos Potatores, & præsertim Cerevisiæ triticeæ, ut Grodicensi Polonæ, Lubecensi dictæ Rommeldeiß / Hannoverianæ Brühhan dictæ &c. Item Vinis Rhenanis, Mosellanis &c. nimium indulgentes, citius, quam fieri alias possit, si Totius cursum semper potulenta absolvere deberent, urinas reddere, & persæpe mingere; Observavi illa animalia omento carentia nullam mingere urinam, quod in avibus, piscibus &c. videre est; Jucundè observavi in sectionibus illorum canum, quibus semper antè sectionem magnam aquæ puræ quantitatem infudi, & mox viventia apertorum, ventriculum adhuc ▽. distentum, quo manū mea pressa, vasa illa Omenti ad ventriculum protensa instar venarum lactearum ▽. turgida; Observavi in variis hydropicis à me dissectis, ad quos simul refero antè duos & quod supra annos à me dissectum Reverendissimum Dn. Dn. Præpositum hujus Civitatis hydrope piè extinctum, omentum vel putridum vel laceratum, vel tumoribus refertum.

Quibus ab experimentis facile potest demonstrari omentum quoque aliquando affici: nam si potatores urinam solito citius reddunt; necesse est aliam adesse viam, per quam potulenta ad renes & ad ipsam vesicam deferri possunt quam assueta alias via, scil. intestina, venæ lacteæ &c. siquidem pilorus stomachi reflexus est, ut non semper potulenta effluere possint.

Porro si messorès intra paucos dies à nimis potulentis hydropici fiunt; si Infantes cum potatores à nimia lactis suctione simul urinam solito citius mingunt; si ille faber ferrarius magnam omenti partem ex herniæ omentalis sectione amissus post difficultate urinæ laboravit, & cum avibus fluidiora excernebat per alvum excrementa; si pisces, aves, &c. omento carentia animalia nullam urinam mingunt, &c. Sequitur necesse potulenta fundum ventriculi petere & per ipsum transudare ea qua omento jungitur regione, & si vasa hujus omenti vel ipsum omentum sint vel lacerata, vel rupta, vel putrefacta, vel tumoribus oedematosi referta, necessario potulenta in cavitatem abdominis decidunt, & sic hydrops excitatur. Et ea propter Omentum post ventriculum afficitur.

Venas lacteas imprimis vero vasa lymphatica quoque affici, modo relata in aprium duxerunt.

Sed si hæ partes solæ afficiuntur, fit hoc ab hydrope citò ingruente; quod si verò hydrops sensim contrahatur, in omnibus hydropis speciebus pars affecta in genere est universum corpus, genus venosum & nervosum, quatenus inquinatum est à particulis crudis, viscidis, serosis, acribus & acidis hinc inde obstructions generantur, quæ efficiunt, ut sic obstructæ partes sanguinem in suo motu impediant & non permittant, ut sanguis & spiritus An. cursum ac officia sua ritè absolvere possint. Cruditas enim magnus existit autor hujus morbi.

Hydropem in Genere comitari solent sequentia symptomata: sitis ingens, respiratio difficilis, tussis, urinæ paucitas &c. Quæ quidem symptomata tamen variant, pro varietate ortus hydropis, & nunc vehementia, nunc benigniora sunt. Species quoque diversæ sunt, ut supra diximus, pro diversitate partis obstructæ & inundatæ.

Hydrops Ascites, à Paracelso vitiosè Asclites communissimè grassatur, & non immeritò dicitur inundatio, sc. diluvium in infimo ventre proveniens ex disruptione vasorum lymphaticorum, quæ rumpuntur à nimia quantitate aquarum serosarum acidarum &c. nunc in vasibus omenti, nunc inter membranas musculorum abdominis, nunc in vasibus lymphaticis mesenterii &c. collectarum, abdomen valde tumefaciens, nec non in pedibus, cruribus & aliquando in scroto tumorem produçens, modo cum, modo sine siti, Dyspnœa & Tussi.

Tympanites non multum recedit ab Ascite, nisi quod flatibus venter infimus simul magis distenditur.

Leucophlegmatia seu Anasarca ostendit inundationem aquarum serosarum in omnibus corporis humani partibus externis per tumorem laxum & mollem.

Hydrocephalus est inundatio aquarum extravasatarum in partibus capitis extra cranium.

Hydrops Pectoris est extravasatio lymphæ serosæ in cavitate thoracis.

Hydrops Uteri est collectio aquosa, subinde in ipsa uteri substantia, subinde inter membranas ejus, rarius in ipsa cavitate.

Hydromphalon & Hydrocele sunt species Herniarum: Hydromphalon est Hernia aquosa umbilicalis; Hydrocele autem Hernia aquosa scrotalis. Ambo ex collectione aquarum; hic in scroto, ille inter Peritonæum & cutem abdominis, quod valde intumescit & German. ein Wasserbruch dicitur.

Omnium communissima species Hydropis Ascites maxime homines affligere & sui præsentiam per tumorem abdominis, pedum, quandoque scroti indicare solet. Tussis, sitis & respiratio difficilis non semper agunt comites.

Dico Tussim, sitim & Dyspnœam non semper comitari hydropem; quia distingvendum est inter hydropem Asciten citò ingruentem; & sensim contrahentem, nam Melfiores & Infantes aliquando citò & paucis diebus incidunt in hydropem, nec tamen Tussis, nec sitis, nec respiratio difficilis simul adsunt, quæ symptomata tamen successu temporis, nisi his ægris maturè succurramus, supervenire solent.

Pars affecta quoque diversa est: In hydropicis, quibus hydrops sensim supervenit, totum genus venosum & nervosum meritò accusatur, & primum subjectum audit, inquinatur enim particulis peregrinis, quæ sanguini & spir. animalibus obices ponunt, & in motu suo præpediuntur, & officia sua debite peragere nesciant. Reliquæ verò partes v. g. Hepar, Lien, Musculi abdominis, Renes, vasa lymphatica in infimo ventre &c. secundariò afficiuntur, quatenus illis à sanguine crasso, impuro, & sale suo volatili defraudato bonus succus denegatur, malus vero seu lymphæ serosa transmittitur.

In illis verò hydropicis, qui cito hoc morbo afficiuntur, plerumque Venter, Omentum & hujus vasa lymphatica afficiuntur; Venter primum patitur, quia in hunc omnes imbres ruunt, qui per fauces ingeruntur, quique per ventriculum, quia potulenta fundum ventriculi petunt, quia non semper per pylorum exitum inveniunt, ad Omentum tendunt & hujus vasa lymphatica.

Liquidum, est illa animalia quæ omento carent, ut aves &c. non mingere, quod phenomenon ansam dedit suspicari per omentum potulenta ad renes pervenire debere; hinc si vasa omenti à nimia quantitate potulentorum ingestorum nimium distenduntur, tandem rumpuntur, liquor ille in his vasibus contentus in cavitationem abdominis influit, & sic Diluvium in infimo ventre instituit, qui tamen liquor ad renes debuisset amandari, & ex his per ureteres ad vesicam urinariam, ex hac autem per urethram in forma urinæ exire.

Stagirita inquit: Tunc demum scimus, quando causam cognoscimus, quare & nobis, ut in accuratam morbi hujus cognitionem deveniamus,

niamus, causam accuratius indagare incumbit, præsertim cum hic morbus pro Medicorum opprobrio vulgò habeatur. Suppono autem in corpore nostro, quod nil nisi contextus vasculosus est, innumeras esse glandulas easque minutissimas, in quibus extremitates & minutissimi surculi arteriarum terminantur; in quibus quoque extremitates & subtilissimi rami venarum suum sumunt ortum: hinc si obstructio fit circa exitum sanguinis arteriosi, qui in hoc statu valdè crassus est & viscidus, & ob vasorum exilitatem ex arteriis in venas transire non potest, alium exitum sibi quærit sanguis, & quâ datâ viâ ad interstitia fibrarum muscutorum, vel ad vasa lymphatica protruditur, ubi hic crassus Sucus incipit restagnare, quia ob suam crassitiem promoveri non potest, sed in sua circulatione impeditur, acescit, & in vasis lymphaticis poros obstruit, quæ vasa lymphatica postea novis semper in sequentibus particulis distenduntur, & tandem propter tenuitatem disrumpuntur. Et Ruptio hæc quando fit in abdomine oritur Ascites, hancque ruptionem vasorum lymphaticorum Causam Immediatam proximam veram hydropis agnoscere fas est.

Quæres, quare hydropis tam multæ sint species, & nunc infimus venter, nunc caput, nunc totum corpus &c. intumescat? ad hanc quæstionem respondet *Loverius* in suo experimento de corde *cap. 2.* ubi refert, quod si canis infra cor vena cava ligatura constringatur, is inferioris ventris hydrope corripiatur: si scapulares verò ligarentur, hydrocephalus emergat: unde certè constat, interruptum sanguinis circulum potissimam hydropis constituere causam. Quamvis & alia adhuc causa in scenam introduci possit; quæ commoditatem refert infimi ventris ad recipiendum & colligendum aquas in suis uberrimis vasis lymphaticis.

Causa ergo continens proxima aperiatio vel ruptio vasorum lymphaticorum in abdomine, quæ aperiuntur, vel quod potus, vel lymphæ aut chylus in corpore abundantiores aut crassiores sunt, aut impetuosius moventur, aut quia acrimonia sua vasa exedunt, aut quod in obstructa antea vasa ab humoribus crassis & pituitosis, vel glandularum mesenterii aut omenti humoribus continuo arietant & tandem rumpunt, & sic quâ datâ portâ ruunt. Certum enim, ceu supra aliquoties dictum, quod affectus hic sæpè consistat in glandularum obstructione, unde lymphæ illæ male per corpus distribuitur, sed potius accessit, fibrillas illas vasorum lymphaticorum rodit, & tandem lacerat, dein quâ datâ portâ ruit.

In Generalioribus diximus Ventriculum plerumque primum in hoc morbo affici; quod quoque verum est, dum in illo cruditates ab ingestis nimis generantur, quò chylus non ritè paretur, sed viscidus, crudus & lentus evadat. Et hæ coctionis cruditates nullibi corrigi possunt: Vitium enim in prima coctione concessum nullibi corrigitur. Omnia in circulum redeunt, hinc si chylus vitiatus sit, totam massam sanguineam, totumque genus nervosum suis inquinamentis inficire & defœdare potest. Chylus enim à digestionē cruda & imperfecta lentescit, qui postea à venis lacteis parum aut nihil purgatur, imo ut supra dictum, labefactatus cordi transmittitur, ex hoc ad omnes corporis partes amandatur, ubi in venis, præsertim lymphæ ductibus segnescit, accumulatur & corrumpitur. Cruditatem hanc ventriculi producant quæ varia sunt: sunt enim vel vina adulterata, quatenus permixta sunt vina generosa vinis acidis; sic quidam vinarii Vina hungarica adeo artificiosè adulterare sciunt, & ex spir. vini, vinis hispanicis, moravienfibus, Austriacis, Grünbergensibus, &c. ea ita parare, ut multi ignorantes illa pro veris vinis hungaricis ori & gulæ summa cum voluptate propinent, & lingvæ vi quadam & impetu stomacho obruant; vel Cerevisiæ fucata & minus quam par est coctæ, vel, ut in quibusdam regionibus fieri solet, cum sale communi, calce viva, fœcibus sacchari &c. in quibus omnibus mira est vis caustica, correctæ, à quibus potionibus ventriculus valdè debilitatur, & tota massa sangvineae inficitur; Vina quamvis generosissima, & Cerevisiæ optimæ, si nimium assumuntur, ingeruntur, hanc malorum lernam quoque inducere queunt; Spiritus Vini vel frumenti si nimium ingurgitatur, ventriculi pilosam substantiam, exedit, eum inflamat, & obstruit, ut postea non bonus, sed chylus crudus, lentus, & noxius conficiatur, & sic quoque cruditatis autor existat.

Cruditas hæc corpus reddit Cacochyimicum & omnes laudabiles succos in eo pervertit in ferositatem, visciditatem & aciditatem, quæ spiritus animales faciunt debiles, ut partes omnes in corpore nostro non rectè irradiare queant; deinde quorundam viscerum texturam & structuram pervertunt, ut non ritè in illis circulatio humorum possit institui, sed vasa obstruantur & Aquæ serosæ hinc inde colligantur. Quæ collectio aquarum cum aliis memoratis locum sibi vendicat Mediatae Causæ proximæ.

Inter Causas Procatarcticas, quæ variæ sunt, primò occurrunt Naturales: ubi notandum omne Temperamentum, omnem ætatem & sexum ad hunc

ad hunc morbum esse proclivia. Præ cæteris verò ad hydropem disponit Temperamentum calidum, quod efficit, ut illi hoc temperamento præditi facilius siti corripiantur, ut libentius bibant, & consequenter commodius in hydropem incidere possint. In statu sano quamvis non permittamus peculiare dari temperamentum, ubi una qualitas præ aliis in sanguine prædominium obtineret, cum omne ad proportionem & justitiam geometricam sit compositum, & temperamentum ad pondus vix dari posset in rerum natura; dicimus tamen nos hic intelligere tale temperamentum calidum, ubi motus primi elementi sanguinem in homine solito velocius exagitat, & ubi sanguis jam à sua naturali & legitima temperie & mixtione parum recessit. Illum enim sanguinem temperatum & probe mixtum cum Beatiss. Dn. D. *Waldsmidio* vocamus, cujus omnes partes convenienti ordine, motu, situ, magnitudine &c. inter se ita conveniunt, ut nulla qualitas præ aliis prædominium obtineat.

Ætatem quod attinet nulla ab hoc malo libera est, laborant eodem infantes, pueri, juvenes & senes. Infantes propter addiphagiam & voracitatem hydrope affectos & ego ultra Rhenum aliquoties observavi. Puerum quatuor annorum & alium undecim annos agentem hoc morbo laborasse nobis *Lister* in suis Observationibus No. 8. & 9. tradidit, Puellam quandam & Puerum 12. annorum hoc morbo vexatos *Felix Platerus* Observationibus suis inseruit. Qui quoque quam plurimos juvenes & senes hydrope Ascite infestatos ipsis illis observat. refert. Juvenem quandam Ascite laborantem *Rodericus à Fonseca* notavit. Omissis aliis quam plurimis Autoribus, qui nos certos faciunt omnem hominum ætatem hoc morbo affici posse.

Sexus nulla ratione habitâ hic morbus aggreditur tum Viros, tum foeminas, quæ tamen juxta Clariss. *Sydenham* huic morbo magis sunt obnoxia quam Viri, præsertim steriles; & quando parere desiverunt. Nota. In gravidis non raro signa hydropis reperiuntur; ibi cautè agendum Medico, ne abortum excitet, exhibendo medicamenta serum educentia: E. respicere debet ipsam mensium suppressionem, versus regionem uteri an tumor magis vergat & an adsint signa imprægnationis.

Magna & Causarum Remotiorum vis atque activitas est in nostrum corpus, ut soepè illæsis adhuc & bene moratis visceribus, sibi que constante naturæ oconomia proprio vitio hydropicam hanc labem inducere

cere aptæ natæ sint: Ex his primum considerandus est Potus, multum conferens ad sanitatem vel conservandam vel turbandam.

Plurimum autem peccat quantitate, dum plus ingeritur, quam concoqui potest, ventriculi enim robur sic infringitur, color ejusdem obruitur, fibræ relaxantur, ipse langvescit, ut nil nisi cruditates in eo generentur.

Peccat quoque qualitate, quando frigidus ingeritur, aut acidus, crudus, crassus, impurus aut spirituosus, ut spir. Vini, quatenus frigiditate, humores incrassantur, fermenta destruuntur, tubuli illi excretorii coarctantur & stringuntur; aut spirituum acrimoniâ pilosa ventriculi substantia exeditur ipseque ventriculus sic in malam dispositionem prosternitur.

Symbolum suum maximè conferunt computationes nimiae, & poculorum certamina, nec non portiones salutiferae, καὶ ἀντιόφρων ita dictæ, die Gesundheits-Trüncke / non minus etiam Potus serotini, die Schlass-Trüncke / qui digestionis negotia interturbant & cruditatibus ansam præbent. Lacticinia pleraque intempestivè aut immodicè usurpata insalubria etiam deprehenduntur.

Plerumque tamen Potatores hoc morbo afficiuntur, quapropter præ aliis causis Nonnaturalibus Potulenta quoque in hoc morbo accusanda sunt: Messorum ab aquis crudis turmatim ingestis hydropici fiunt; Generosiores verò & heroës à vinis tam generosis quam adulteratis in hydropem incidunt. De quibus potulentis jam supra pluribus locuti sumus.

Nocet quoque refrigeratio corporis subita post intensum calorem, quatenus obstruuntur pori vasorum capillarium.

Excreta & Retenta multum quoque faciunt: Si enim excernantur, quæ retineri debebant, calor natus depauperatur, vires infringuntur, spiritus animales nec non vitales debilitantur, ut facile viscera, aliæque partes obstruantur, seri colluvies hinc inde colligatur, & sic affectui huic fores aperiantur.

Si autem retineantur, quæ excerni debebant, non minor inde noxa timenda est, quam ut præcaveret natura, tot ac tam notabilia excretoria in toto corpore constituere voluit, unde pro sano iste habendus est, qui benè ingerit, digerit & egerit.

Feces alvinæ non debito tempore redditæ concoctionem atque digestionem impediunt, humores vitales conspurcant &c. Ut & urina retenta causa hydropis esse potest.

Mensium

Mensium obstructio, quia propter restagnationem sanguinis acrimonia præternaturalis inducitur, calorque nativus obruitur à sanguine isto fœculento.

Simile quid asserendum ferè est de impedito fluxu hæmorrhoidum in iis, quibus familiaris est. Unde *Hipp. A.* diuturnis hæmorrhoidibus curato, nisi una quæpiam servetur, periculum ∇ . inter cutem, vel tabis impendet.

Longæ quoque obstructiones in hepate & liene quæ hydropem præcedunt, unde sanguinis circulatio & ventilatio impeditur, & eo modo acrior fit.

Transpiratio sensibilis & insensibilis quemadmodum sanguinis ventilationi & depurationi inservit, ita si inhibita fuerit, fuligines massæ sanguineæ retinentur, particule serosæ in eâ coacervantur, & ad præternaturalem statum disponuntur.

Nimiæ evacuationes: ut hæmorrhagiæ narium; sanguinis per os ejectio; vasta hæmorrhoidum profusio, quas propter Spiritus vitales dissipantur.

Speçtat huc quoque Venus, quæ si immodica fuerit, calorem naturalem dissipat, corpus refrigerat, spiritus debilitat, ac cruditates inducit.

Animi affectus: ut Melancholia, Tristitia, metus &c. qui pessimi sunt omnium animi affectus, sanguinem enim incrassant, humores figunt, spiritus obtenebrant, atque ita morbo præsentis quam maxime manus porrigunt.

Item Buprestes animal insectum quoddam, contharidi & specie & viribus adsimile: hoc animalculum autem assumptum facit stomachi infinitum dolorem, totumque corpus in speciem hydropici inflat. Integræ Buprestis historiam vide sis apud *Ulyss. Aldrovand. L. 4. de Insectis cap. 6.* At cum hoc inter rarò contingentia numerari debet, hanc causam nominasse satis esse videtur.

Hic affectus aliis quoque morbis supervenire solet: ut Tertianæ, quæ causa huius morbi existere potest, 1. ob culpam regiminis in diætâ, quando æger nimium appetitui indulget, vel etiam siti, unde non rarò pori intestinorum & ventriculi obstruuntur, vapores detinentur; lymphæ viscida obstructiones parit, & tandem in cavitatem abdominis exstillat. 2. Culpâ Medicamentorum, quando nempe styptica, incrassantia, opiataque

nimum adhibentur, unde contumaces viscerum obstructions oriuntur, & consequenter lymphæ restagnatio.

Quartanarii idem ob errorem incibo & potu commissum facile hydropici fiunt, quia calor labefactatur, unde vitiosus deinde chylus generatur.

Ex Ictero hydropis orti Mihi Ipsi occurrit exemplum in Nobili Coniuge Prænobilis ac Amplissimi Domini Stanislai Recscinsky Dioeceseos Fraustadiensis circa vectigalia Administratoris gravissimi, Amici, Patroni ac Compatriis Mei plurimum honorandi. Matrona hæc per aliquot annos suppressione mensium & hysterica passione vexata incidit in Icterus nigrum cum febre continua & ardente, quæ, quamvis ab Hippocrate Icterus in febribus ante diem septimum ægros invadens, malus iudicetur *Aphor. 62. S. 4.* intra 14. dies feliciter à me ab hoc morbo liberata tamen cum cum Illustrissimo & Generosissimo Dom. Dom. Castellano Ponninsky me oporteret thermas proficisci & domum reversus valdè tumida in abdomine, & hydrope Ascite laborans reperiébatur; quæ deinde tamen Deo sit Laus à me (absit jactantia dicto) iterum feliciter in pristinam sanitatem restituta est. Ictericos facile hydropicos fieri posse, ex eo patet, quod Icterus non ex obstructione lienis, ut veteribus visum fuit, sed ab obstructione vasorum capillarum & impedita per vasa hæc circulatione facta ab intemperie sanguinis viscida & coagulationi leviter obnoxia oriatur. Hinc si errores circa hunc morbum in potu committuntur vasa jam antea ad obstructionem disposita facile de novo obstrui possunt, & sic restagnationem feri causari. Item juxta *Hipp. Aph. 42. Sect. 6.* Regio morbo laborantibus jecur durum fieri posse, qui autem malum iudicatur.

Anasarcam in Ascitem degenerare docuit nos *Hipp. Sect. 7. Aph. 74.* Albæ pituitæ aqua intercus supervenit, plura infra in ipsa Anasarca.

Hæcticos aliquando quoque in hydropem incidere posse, non negandum; habui enim exemplum in Illustriss. & Reverendissimo Dn. Dn. N. N. olim hujus civitatis Præposito, nunc Beato, qui ex Hæctica Pulmonum in Tympanitem cum Ascite inciderat. Quæque Historia januam in descriptione Tympanitis aperiet. Provenit ex nimia profusione sanguinis, ubi spiritus depauperantur, qui postea in suis viribus deficiunt, & humores non debite circumagere possunt.

Diarrhœam stypticis curatam perſœpe hydrops ſequitur. Cura enim in Diarrhœa ſtypticis inchoata contumaces viſcerum & inteſtinorum obſtructiones introducit. Scirrhis viſcerum, inflammationibus &c. etiam Cachexiæ facillimè ſupervenire ſolet.

Qui morbi quoque Hydropem Aſcitem ordinariò concomitantur.

Hydrops alius eſt incipiens & imperfectus: alius eſt inveteratus ac confirmatus, alius levis, alius gravis, alius graviffimus ſeu conſummatus. Alius citò ingruens: alius ſenſim contractus. Hydrops per ſe incipiens primariùs audit; Alteri morbo ſupervenientiſ ſecundariùs. Alius eſt ex potulentis: alius ex cruditate ciborum &c.

Cognoſcitur autem Aſcites facilè à tumore abdominis, pedum, qui tumor indies augetur, præſentiam enim ſuam nescit abſcondere, attamen in aliis citiùs, in aliis tardius abdomen accreſcit, quandoque pro varia Lunæ phaſi decrementum patitur. Interdum ſimul pubeſ tument in utroque ſexu, in viris ſcrotum, per quod ſponte apertum militem ab hoc morbo liberatum tradit Clariff. ac Doctiff. Dn. Dn. *Doleus* in ſua Encyclopœdia medica, pag. 556. qui Miles per ſcrotum plus quam 40. libras aquæ emiſit, & feliciter ſanitati per id reſtitutus eſt.

Porro in hydropicis præſertim in illis. qui jam inveteratum agunt, morbum obſervantur urinæ paucæ: quia lymphæ ſeu ſerum, quod per ductus ordinarios ordinariè eliminari debuerat, in cavitatem abdominis demittitur: vel in principio ex obſtuctione vaſorum ad veſicam tendentium; vel in confirmato hydrope ob vaſa rupta, quapropter ſerum non amplius ad veſicam mitti poteſt. Craſſæ; ex intemperie ſanguinis viſcida. Rubræ; à copia ſalium. Tantalea ſitis; partim ab acredine & ſalſedine particularum ſanguinis à ſero ad glandulas faucium & lingvæ tranſmiſſarum; partim etiam à defectu humiditatis, quæ, cum deberet ut in ſtatu naturali ad fauces tranſmitti, in cavitatem abdominis deponitur, unde & ægri febre quadam laborant. Tuſſis ſicca; quæ fit, quando Materia hinc inde ſtagnans aceſcit & acrior fit, ac talis aqua acris ad pulmones, pectus & Bronchia penetrat, unde ægroti quandoque tuſſi vexantur. Dyſpnœa; ex materia ſeu aquis acutis Diaphragma prementibus. Totum reſpirationis negotium conſiſtit in libera diaphragmatis aliorumque Thoracis & abdominis muſculorum motione, organum enim reſpirationis præcipuum eſt diaphragma, quod cum cæteris muſculis, ex duplici enim muſculo

sculo compositum, pari passu ambulat, & motui dicatum est. Quod à spiritibus animal. inflatum protrudit costas & abdominis musculos, qui incumbentem aërem externam premunt, ut per tracheam ingrediatur & pulmones inflentur &c. Postea autem atmosphærae incumbentis gravitas obstans elevato thoraci & abdomini, efficit ut tensio diaphragmatis statim relaxetur, pulmones iterum collabantur, & sic expiratio producat. Hinc quando Diaphragma in libero suo motu non impeditur, respiratio etiam est libera; sin vero à materia quadam Diaphragma premente; hoc in suo motu præpeditur, respiratio fit difficilis. Et hæc quoque in aliquibus hydropicis producit ex aqua vel in musculis abdominis, vel in vasis lymphaticis, vel in Omento, Peritonæo &c. collecta, Diaphragma & musculos abdominis nimia sua quantitate graviter premente. Partium extenuatio & contabescencia superiorum & inferiorum; ab acrimonia Bina & crassa sanguinis, quæ aliquando ipsam pulmonum substantiam erodit, eosque inflammat, exulcerat, & sic hecticam pulmonum seu phthisin excitat. Ubi observavi in dissectione Illustr. & Rever. Dn. Dn. Præpositi, cujus pulmonum substantia penitus erat ulcerosa. Febris lenta: quæ provenit à visciditate acri; & maximè circa vesperam observatur cum pulsu frequentiori & parvo, & cum quadam tensione, siti ingenti. Facies etiam flavet, ab obstructione vasorum capillarium & æger videtur quasi Ictero laborare. Plerumque fluctuatio aquarum manifesta percipitur, cum æger se in lecto de latere in latus circumvolvitur & convertitur.

Eleganter quidem signa ferè omnia comprehendit Franciscus de Porta de signis morborum l. 3. c. 12. Hydropem foedus color arguit & tumor ingens. Et sitis & dispnoea, cibique aversa cupido. Occupat & varias inflatio turgida fedes. Quandoque, quamvis non semper, appetitus prostratus, nausea, vomitus, diarrhoea, ulcuscula in pedibus, cruribusque manantia. Semper hunc morbum comitatur Tantalea sitis, quæ bibendo exasperatur, nam quo plus sunt potæ, plus sitiuntur aquæ.

Quæ signa tamen omnia non semper adsunt, præsertim ab initio & in hydrope citò ingruente, ut supra mentionem fecimus.

Quæres, an ex urina omnium morborum homines affligentium signa certa peti possint? e. g. Ophthalmiæ, Scabiei, Strumarum, claudicationis &c. Sic hic Fraustadii quædam desiderabat ut illi ex urinis dico-

rem an filia ejus claudicaret, & quo cum pede; alia an in collo haberet strumam; alia surditatem, alia coecitatem urgebat scire, &c. veniunt enim, & quasi statuae se gerunt, nec ad quicquam respondent, etsi interrogentur, tantum dicunt: Der Herr Doctor wird wohl aus dem Urin sehen / was der Persohn fehle: Hoc præ cæteris strenuè desiderant scire: Ob aus dem Urin der Herr Doctor könne sagen / daß dem Kranken gewißlich zu helfen sey / und ob er nicht sterben werde &c. ad hæc respondeo, ridiculum esse vulgum suæ salutis & mortis prognostica certissima ex urinis petere velle, infidus enim valetudinis interpres est urina, & quamvis aliquo modo signa generaliora ex eâ cognosci possint, nunquam tamen illis solis fidendum, quia incerta sunt, imprimis si verax prognostes esse velis. Sin Agyrtarum more plus quæstum facias, quam ipsam veritatem, nihil amplius quidem requiritur, quàm ut multa garrias, & quadrata rotundis misceas; nemo enim erit, qui ad contradictoria & figmenta attenderit; sufficit si semel verum dixeris; sic enim more diaboli unica veritate, mille vendes mendacia. Theologi dicunt, qui confitetur peccata sua, illi quoque ea remittuntur; sic in medicina quoque præstat morbum confiteri, & medicum ad lectum admittere, quam signis urinæ nudis decipi velle. Nam si medico licitum est non solum ex urinâ, sed & ab ore ægrotantis, & motu & pulsu cordis simul specialiora & certiora signa sumere, profectò etiam agrotus felicius, certius, tutius & jucundius à morbo suo deliberatur, absolvitur, & in integrum restituitur. Plus enim valet exploratio pulsus seu motus sanguinis. quam signa urinæ: Ille enim non solum sanguinis consistentiam & mixtionem secundum singulas partes nobis revelat; sed etiam de spirituum animalium vigore, vel imbecillitate, ordine, vel *ἀταξία* & consequenter à tota oeconomia animali testatur.

Prognosis: in qua summus honor & securitas medici est, siquid enim est quod Medicum magis admirabilem reddat in praxi, sane est prognos, hæc enim teste *Botaldo* de medici & ægri munere §. 21. omnibus præstat. In prognosi Medicus expertus ac doctus cognosci potest: hinc si quis in sua prognosi nimis securè incedit, ita ut omnibus ægrotis indiscriminatim modo mortem prædicat, qui tamen postea convalescent; modo ægros certissimè evadere promittit, dicens: in hac ægra certissima salutis habeo signa, ægra non morietur, qui tamen mortem osculantur, Ille certè

de jure non meretur, ut Nomen Medici Rationalis ac veri ei imponatur, sed potius ficti, Idiotæ & Impostoris, talesque impostores saltim eo tendunt, ut majores in hoc passu acquirant laudes, applausum captent & ægrotorum copiam, h. e. quæstus causam sollicitent: potest enim fieri, quod æger, cui scyllam jam prædixissent, sanus evadat. Sed hoc non observatur nec curatur, si modo à veteri sic dicto Practico hoc producitur; si verò Medicus rationalis ac Academicus in minimis, siquidem Medicus non est Ipse DEus, sed Minister duntaxat DEI & Naturæ audit, erret, Bonè DEus! quanta sinistra judicia, quantas contumelias, præsertim ab Alberto illo Magno, qui quidem magnus quantitate, revera autem qualitate valde Albertus, illum oporteat subire.

In nostro affectu modò bonum, modò malum promittere possumus eventum: in principio facilè curatur, præsertim quando sit à nimia potulentorum frigidorum ingestione; uti in Messoribus aliisque Bacchanalia celebrantibus, qui facilè curantur per cathartica & diuretica. Item in infantibus ex nimia voracitate; ubi Medicamentis proficuis cruditates evacuari debent. Et in quibus Tussis, sitis, Dyspnœa non adeò urgent, nec ruptio vasorum jam præcessit. Qui quoque citius aliis ab hoc malo liberari possunt. Huc conferenda est Ætas: Sic Juniores melius ferunt hunc morbum quam senes, minus enim periclitantur ægri, quorum constitutioni & ætati conformis est morbus, inquit enim *Hipp. Sect. 2. aph. 34.* In morbis minus periclitantur, quorum naturæ & ætati & habitui & temporis morbus magis affinis fuerit, quam hi, quibus in nullo horum cognatus fuerit. Sexus: hinc Mulieres præ viris etiam facilius curantur, quia vias habent magis patulas. Ratione Ætatis: Senes hunc morbum non benè ferunt iterum dicente *Hipp. Sect. 2. Aph. 33.* Magnam partem senes juvenibus minus ægrotant: Quicunque verò morbi iis accidunt diuturni, plerumque commoriuntur. Insanis superveniens bonum est, statuente *Hipp. Sect. 7. Aph. 5.* Ab insania, difficultas intestinorum, aut hydrops, aut mentis alienatio, bonum. Item post febres Ascites superveniens sæpius curatur. Si verò morbus jam inveteratus sit, Omentum scirrhosum, ulcerosum cum reliquis partibus, omninò incurabilis habetur, & optimo jure huc referri queunt versiculi:

Principiis obsta sero medicina paratur,

Cum mola per longas invaluerit moras.

Et ve-

Et verissimè Persius canit:

*Helleborum frustra cum jam cutis agræ tumebit,
Poscentem videas; venienti occurrere morbo.*

Rarò curatur ubi longè præcesserunt viscerum obstructions & scirrhî, mensium restagnationes; sanguinis nimix evacuationes, & phthisis. Phthisin aliquando hydropem secutum esse multi autores probant, & ipsa experientia hoc docet, nec non ratio confirmat, ut jam supra dictum est.

Inveteratum esse morbum indicant Respiratio difficilis, quæ quò difficilior eò pejor, & quandoque humores in abdomine morâ esse incrassatos indicat, ita ut vapores inde elevati non liberè per poros diaphragmatis transeant; sed idè motum ejus vel magis vel minus impediunt, quoties redundant humores vitiosi. Imprimis si simul acres sint periculum est; acrimonia enim partes illas adjacentes & transeuntes facili Marte corrodit, uti aliquoties & in Reverend. Dn. Præpos. Ascite cum Tympanite hydrope defuncto omentum totum fermè corrosus offendit, quod facile putrescit, unde affectus existit incurabilis, omnis enim potus labitur statim in abdomen. Potest tamen & aliquando respiratio difficilis ob solam aquarum in vasis restagnationem excitari; & hæc non statim lethalis existit, siquidem multi hydropici difficulter respirantes restituti sunt.

Sitis quoque malum signum habetur, quam tamen non in omnibus observavi, & aliquot novi hydropicos de siti non adeo conquerentes, qui tamen vitam cum morte mutarunt; alios ingenti siti laborantes & tamen ab hoc morbo liberatos vidi. Tantalea sitis significat lympham tam copiosè in cavitatem abdominis deponi, ut sanguis inde siccior evadat, & non sat humidi pro saliva in se contineat ad os humectandum.

Tussim lethale esse malum jamdudum nos docuit Senex divinus Cons. Aph. 47. S. 7. Si hydropicum tussis habeat, desperatus est, Hydropicis tussis si superveniat malum Aph. 15. 5. 6. Tussis provenit ab acrimonia humoris, qui ad pulmones delatus ibidem tyrannidem suam exercet; corrodit enim pulmones, easque inflammat & sic ulcera in iis producit: inde si Phthisis non præcesserit hydropem modò sequitur. Phthisin in secundo & tertio gradu incurabilem esse patet ex omnium Practicorum libris praticis; hinc si hydropicos invadit, multò magis malum esse lethale nobis ostendit. Celsus etiam affirmat L. 2. c. 8. p. 72. dic. tussis omnem curationis spem tollit.

Cachectici ob obstructionem viscerum præsertim in hepate, in quæ bilis non generati potest rarissime perfectam adipiscuntur sanitatem plerumque enim in hydropicis bilis nigra & spissior ordinario reperitur.

Pertinent huc sequentia prognostica, ut Hippocratis quæ habet *L. 7. Popular. Titul. 13. p. 838. & 839.* nec non Coaca Prænotion. *Tit. 452.* hydrops inquit, febri ardenti superveniens, malus. Quod confirmat C. Celsus *L. 2 c. 8. p. 71. & Aph. 55. Sect. 7.* Quibus jecur aqua repertum eruperit in omentum, his venter aqua repletur atque moriuntur; ex hoc patet Hippocratem jam omentum in hoc morbo suspectum habuisse. Prænotion. *Coac. 456.* aquâ intercutem laboranti cum febre urina pauca & conturbata, perniciem denotat: & Coaca sequenti ait: aquæ inter cutem initio aquosum alvi profluvium absque cruditate exortum, morbum solvit, & 460. aqua inter cutem, quæ curationi cessit, ubi recurrit, spem tollit, &c.

Ulcera in corpore exorta hydropicis non facile sanari. testatur Hipp. *S. 6. A. 8.* hoc confirmat C. Celsus. *T. 3. c. 21. p. 161.* quod caput totum lectu dignum de Hydrope est. Abdomen in Ascite aliquando ulcerosum fieri ultimos vitæ dies indicat; significat enim gangrænosam musculorum abdominis substantiam quam sequitur dolor excruciatissimus in abdomine, femore & tibiis, & tandem mors quæ animam à corpore solvit.

Omnium pessimum signum est fluor alvi, qui prodromus est instantis mortis, dicente Hipp. *L. 4. de morbis Text. 34. p. 16.* alvus valde fluida hydropi superveniens citissime moritur & sentiens & loquens. *It. Ap. 5. S. 8.* Ex morbo diuturna alvi fluor, lethale. Oritur propter poros destructos qui permittunt, ut quævis humiditas ab aliis partibus effluere posset in abdomen & ibi Diarrhœam excitare, quæ sæpe aliquot, sæpe quoque paucis diebus præcedere solet obitum hydropicorum. Ubi vero ut supra dictum ab initio morbi aquosum accidat profluvium alvi absque cruditate, tunc ut plurimum morbum solvit.

Tympanites altera species hydropis non multum recedit ab Ascite, nisi quod flatus in abdomine simul adsint, & abdomen ea propter magis distendum deprehendatur; Rarò enim flatus soli afficiunt, & quamvis quoque hoc esset, tamen Tympanitis successu temporis in Asciten degeneratur. Ut plurimum Tympanites comitem habere solet Asciten, quod multi probant Autores: Præceptor meus quondam Doctissimus Dominus Doctor Joh. Jacob Waldsmidt in notis supra praxin Barbettianam hæc habet: Tym-

Tympanites nunquam invenitur sine Ascite, quia nunquam flatus reperiuntur sine sero, adeoque distensio musculorum in abdomine est major & magis rigida propter flatus, quia magis distendunt. *Gockelius* D. Physicus Ulmenfis & aliquot Ducum Wirtembergensium Archiator conscripsit casum Tympanitis cum Ascite in Vidua quadam 43. annorum, hæmorrhagiis nimis narium supervenientis cum tussi & materiæ multæ excreatione. *Felix Platerus* in suis Observationibus medicis *Lib. 3.* aliquot casus Tympanitis cum Ascite recenset, ut *pag. 653.* ex hæmorrhoidum consuetarum suppressione *pag. 657.* in Abbate sexagenario lautè viventi & obeso, nigram cum pituita materiam expuente. *Clariss. Deckerus* in *Barbette* notavit: Raro flatus tympanitem efficientes solummodò in abdomine contineri; sed plerumque aquis permixtos. & *Mangetta*: Tympanites post longum tempus Ascitem sibi facit Comitem. *Doctiss. D. D. Dolaus in Encyclopæd. Med.* inquit: Tympanitem partim à flatibus, partim autem ab extravasato sero produci, Tympanites enim rarò solitarius est, sed ordinario Ascitem habet Comitem.

In Tympanite cum Ascite ex profusione Sangvinis seu ut clarius loquar Hecticam pulmonum sequente unicus tantum casus mihi occurrit. Hic *Fraustadii* in *Illustr. & Reverendiss. Dn.* hujus Civitatis Præposito.

Illustr. & Reverend. D. Dn. N. N. Præpositus *Fraustadiensis* annuagens 37. Temperamenti sanguinei, Obesus antea & valde Pletoricus vinis nimium indulgens, ut ex ore ipsius per sæpe audiui, ante annos & quod supra duos primum per vices vexatus est tussi adeo vehementi ut quandoque metus suffocationis illi impenderet, quæ tussis aucta per tempus excitavit ejectiones sputi sanguine tincti, quandoque magna sanguinis floridi quantitas profusa est; subsecutus est calor mordax modo totum tractum, modo volas manuum infestans, cum atrophia totius &c. in ventre quoque interdum passiones colicas, murmura in intestinis & circa lumbos dolores sensit cum intumescencia quadam seu distensione erratica, quæ tamen ante septimanas 40. in abdomine seu infimo ventre suum habitaculum quærebat, idque ibidem inveniebat, ita ut successivè abdomen in magnam acresceret molem & ingentem ostenderet tumorem; venter digito percussus sonum instar tympani edebat. Ego 4. septimanis ante ejus discessum ex hac vitâ vocatus inveni eum jam hydropicum consummatum, simul Tussi, respiratione difficili, dolore sinistri lateris in Thorace,

cum calore in volis manuum & pedum plantis, febris lenta laborantem materiam viscidam & sanguine tinctam ejicientem, urina rubra & spumosa, Facies apparebat rubicunda, sitis autem non adeo intensa erat. Pedum tumor ultimis septimanis supervenit, absque Scroti intumescencia.

Affectum hunc nominavi Tympanitem cum Ascite Hecticam pulmonum subsecutam. Hecticam adfuisse indicat ejectio sanguinis floridi à ruptione vasorum pulmonum & sputi sanguine tincti ab ulcere in pulmonibus, Tussis, & Atrophia.

Tussis in principio per intervalla infestans jam Phthisin imminere & intemperiem sanguinis adesse acrem & acidam indicavit; hinc à nimio continuato potu sanguis acidior & actior redditus pulmones magis magisque irritavit & Tussim auxit. Pulmones à lymphâ acri corrosi & irritati facile lædi possunt, hinc inflammari & exulcerari; facillimè si nimia potulenta præsertim æstuantibus ex nimia motione pulmonibus ingerantur: ubi non solum in pulmonibus, verum etiam passim in nostro corpore obstructions generari possunt, quæ deinde tum ad Hecticam, Ascitem & Tympanitem sternere viam queunt.

Notum est, plurima vina acido-austeris gaudere particulis, & cum simul sint spirituosâ, non mirum quod in nostro defuncto talis acido austeritas obstructions tum in intestinis, tum in ipso abdomine, aliisque partibus pepererit, ut inde pori obstructi spiritibus seu flatibus exitum non permiserint, qui postea vel circa umbilicum vel circa lumbos tormina & dolores excitarint. Et cum flatus in omnibus corporis partibus & quâlibet cavitate generari possint, possunt quoque hinc inde distensiones produci. Quia verò cavitas infimi ventris capacior est reliquis in homine existentibus cavitatibus; quoque abdomen ob majorem feri & flatuum in eo contentorum quantitatem magis extendi potest & consequenter majorem offerre tumorem, qui abdomen adeo vel distendit, ut percussum digitis sonum instar tympani edat. Et cum modo recensita phœnomena & in nostro casu observata fuerint, non immerito tympanitem simul adesse suspicatus sum; quæ tamen per tempus sibi Ascitem comitem adjunxit: Cujus natura in sua structura fufus jam explicata est.

Tumor in Nostro Defuncto partim à sero extravasato, partim à flatibus productus est. Respiratio difficilis tam ab exulceratione lobi pulmonis sinistri, quam ab aquis Diaphragma præmentibus orta. Dolor in sinistro latere

latere Thoracis uleus in sinistro lobo pulmonis aperte ostendit. Ejectio materiae purulentæ & floridi sanguinis nec non Atrophia, quæ quidem in hydropicis Asciticis consummatis quoque observatur, tamen etiam simul Phthisin indicaverunt. Febrim lentam calor prodidit. Facies rubicunda: in Tympanite non ita de ordinario recedit statu facies, erat enim Plethoricus facie rubicunda gaudens; quamvis & hæc rubedo pro symptomate haberi possit, præsertim si rubedo non semper in facie appareat, & tunc à feбри, quæ hanc rubedinem in facie facilius deponit, quia cutis ibidem tenuior est magisque transparentis.

Æger noster ex usu clysterum & Emplastrorum carminantium multos per inferiora flatus, per superiora vero ructus emittebat, venter octavo ante obitum die incipiebat detumescere & flaccescere, quod malum quidem fuit signum; indicabat enim membranas musculorum flatibus & sero distentas ruptas esse, hinc quoque distensionis relaxatio & remissio facta. Unguentum quoque à veteri sic dicto Practico antea Theologiæ studioso abdomini applicatum est, quod tamen diu sustinere Reverend. Dn. non valebat, erumpebant enim ab unctione hujus Unguenti, quod summum in hydrope esse arcanum ille Medicus fictus jactitabat, multæ pustulæ & ulcuseula in cute ventris, quæ Ægrum ante miserum summis doloribus exerciaverunt, quapropter & amplius admittere nolebat. Et quamvis hoc arcanum, cujus compositionem nulli exponere nostrum ille Physicus cupiebat, à Me & Reliquis duobus Excell. Medicis & Promotis Doctoribus rejiceretur, tamen ex commendatione Nobiliss. Domini Hospitis Egregii Viri quidem, sed in hac parte nimis præcipitanter agentis Linimentum hoc nos oportebat admittere. Huc refer, quæ supra de glandulis mesenterii induratis diximus, an in expanso abdomine digitis tangi possint? Quam hypothesin etiam ille Physicus statuit, quod negativè respondendi, cum impossibile sit, illud, quod medio in sacco magno aquis vel flatibus distento absconditur, digitis perscrutari. Ultimis diebus usus est medicamenti Medici cujusdam Wolaviensis; quibus tamen anima in corpore retineri non potuit, sed hoc deferens, proh DEum! d. 11. Octobr. 1696. inter 10. & 11. horam vespertinam summo cum mœrore & dolore multorum adstantium amicorum Creatorem suum rediit.

Et cum Illustribus Cognatis non displicuerit Sectionem, quò veram morbi & mortis causam acquisiverint instituere, & me, ut circa hanc ope-

rationem dirigerem, amanter rogaverint; quoque hanc sectionem una cum Domino *Jeremia Pezelio* hujus Civitatis Chirurgo ad hocce munus vocato peragere suscepi. Examini primum subjecimus Thoracem, & in eo pulmones, quorum sinister lobus totus putridus & exulcerosus, dextri verò pars aliqua putrida & Ulcusculis infecta fuerunt; In Cordis thalamis paucus sanguis iisque niger & grumofus reperiēbatur, nec non in cavitate Thoracis aliquot libræ feri putridi, visceridi & purulenti. In infimo ventre observata sunt: Venter parvus, nodis hinc inde refertus & densus; Intestina partim adhuc flatibus distenta, partim ab illis libera, omnia quasi semicocta; Diaphragma quoque ex utroque latere quasi coctum apparebat; Hepar durum & naturali rubedine destitutum, in cujus vesicula fellea bilis nigra & spissa; Omentum nigrum, putridum, lacertum, & ab omnibus partibus, quibus naturaliter adherere deberet, separatum; hinc quoque potulenta omnia e ventriculo in cavitatem abdominis exstillata sunt, &, quia per renes ad vesicam transferri non potuerunt, ibidem collecta: unde in cavitate abdominis libras ferè 40 feri partim fluidi, partim verò glutinosi & faciem Gelatinæ fermè referentis reperi; Renes parum lividi omni pingvedine derelicti, & Mesenterium valde Crassum & non secundum suam naturam debite extensum, cujus glandulæ induratae quidem erant, sed non adeò magnæ, ut ægro adhuc viventi in ventre distento potuerint digitis tangi. Quæ omnia iterum meam opinionem confirmarunt, Morbum hunc reverà Hecticam cum Tympanite fuisse Asciten Comitem habente.

Hectica quamvis causa fuerit remota hujus morbi, hunc tamen usque ad finem semper comitata est. Datur enim hydrops cum Phthisi, quæ aliquando præcedit, quandoque quoque comes est. Nam Phthisis nihil aliud est quam Hectica pulmonum: Hæc Genus; Illa species vocatur. Hinc falsum est, quod iterum Physicus ille somniavit: Hecticam nunquam hydropem comitari; sed qualis vir, talis oratio.

Diximus Tympanitem nunquam sine sero reperiri: quod probatur 1. per naturam ventorum, qui nihil aliud sunt quam vi caloris subterranei commoti vapores, qui dilatati ex loco angustiori, in quo prius erant, in alium transeunt, ubi facilius expandi possint. Cum enim multi vapores in cavitatibus montium vel cryptis terrarum, v. g. contenti subterraneo calore celeriter rotari incipiunt circa suum centrum, tunc magis exigentes

gentes spatium, quam antea se invicem per terræ meatus magno impetu expellunt; egredientesque & obvium sibi aërem rapientes ventos excitant: Si his vaporibus exitus denegetur, Terræ sequuntur motus. Prob. 2, experientia chimica: Hoc etiam in aliorum spirituum distillationibus observatur. In parandis spiritibus chemicis v. g. C. C. Tartari &c. Sicca retortæ terreæ induntur, quæ ubique munita recipienti coaptata & igni imposita, ex materiis sive C. C. seu Tartaro &c. per collum suum flatus emittit in recipiens, hinc si ignis parum nimis augetur, vapores in copiâ ascendentes vi quadam appositum vitrum rumpunt, & flatus seu venti per totum laboratorium percipiuntur. 3. Per æolipilas: quæ sunt globi ex ære, cavi, & omni ex parte clausi, præter quod à latere exiguum foramen habeant; quorum pars inferior si aqua repleatur, deinde globi igni imponantur actione caloris multæ aquæ partes intra æolipilas attollentur, & magno impetu per foramen egredientur; sicque sentietur ventus satis validus, qui non desinet, nisi post exhaustam æolipilæ aquam. Eodem igitur ferè modo excitantur flatus in corpore nostro humano; cum enim materia quædam apta Serum &c. deponitur in loco apto cujus pori ubique clausi, serum continuè de se spirat vapores ab interno calore sanguinis elevatos, qui vapores postea exitum non invenientes abdomen aliasque corporis partes distendunt, dolores & incondita murmura exoriuntur. Hinc Causa proxima in Tympanite incipiente est serum cum flatibus abdomen distendentibus; ubi vero per tempus Asciten comitem sibi adjunxerit, eandem agnoscit causam cum Ascite, nisi quod simul flatus in abdomine reperiantur, quæ in nostro casu observanda.

Causa antecedens est flatulenta rarefactio, quæ fit ex mucò in primis viis coadervato, in quem vel salia volatilia assumptorum, vel ipsa etiam bilis pinguior facta incidunt, & sic depravatam in intestinis aliisque partibus effervescentiam instituunt.

Inter Causas remotas maximè accusantur quæ flatus & pituitam generare possunt. E. G. Omnia flatulenta; cruda, acida, austera & mucosa.

Inter flatulenta numerantur omnia leguminosa; v. g. pisâ fabæ &c. Oryza. Rapæ, quarum foliis si vaccæ affatim vescuntur & statim frigidam superbibunt; flatibus adeo afficiuntur, ita ut illorum copiâ illa in vaccis rumpantur.

Panis viscidus & adhuc à forno calens præsertim Ille panis similagineus recens à Fraustadiensibus *Griesz Semmel* dictus, qui à forno adhuc calidus & delibatus Pueris à parentibus suis ibidem singulis septimanis semel in gratiam bonæ affectionis offertur.

Intentio bona, consequentia autem mala; nam si scirent ejusmodi calentem panem causam existere contumacissimarum hinc inde obstructionum præsertim in ventriculo & intestinis à quibus non solum postea Tormina ventris, colica &c. verum etiam alii gravissimi morbi ortum suum ducunt; certè lubentet ab hac bonâ affectione abstinerent, & hunc panem calidum à mensâ proscriberent.

Brassica capitata muriâ condita, quæ turbas in primis viis movet, & sagvinem tumultuariè fermentat.

Poma immatura, quæ acido-austeritate sua magnas in ventriculo & intestinis excitant turbas.

Pruna, mala persica, mora, fraga, melones, cucumeres facile in liquamen putridum abeunt, fermenta viscerum destruunt, & prævia fermentatione acriora spicula extravertendo choleram, alvi fluxum, colicam & consequenter Tympanitem producere possunt.

Vina adulterata, acida, austera; Item Cerevisiæ veteres & acidæ quæ aciditate & austeritate sua non solum primis viis ut ventriculo & intestinis infensa sunt & ibidem exorutiatissimos dolores excitant; verum etiam sanguinem & lympham acescere faciunt, & ad coagulationem disponunt, unde succus nutritius in capillaribus vasculis facile præcipitatur, præcipitatus restagnat, restagnans plus acescit, acescens vicinos succos præterlabentes inquinat, ut inde varia emergant phænomena, toti œconomix animali fatalia.

Aqua frigida, quæ si crudis fructibus v. g. prunis, peponibus, cucumeribus, rapis &c. superbibatur, Tympanitis quoque causa existere potest.

Interea non excludenda sunt, quæ simul Asciten producere valent, & quorum jam supra in Ascitis descriptione mentionem fecimus.

Vulneri supervenientem Tympanitem à spasmodico motu Spirituum animalium partes abdominis membranaceas inflantium notavit Willisius. Sed cum inter rarò contingentia annumerandum hoc phænomenon, sufficit saltem indicasse.

Signa Diagnostica incurrunt in sensus; adest magna abdominis distensio, Abdomen percussum sonum edit, Fluctuatio aquarum in ventre non ita percipitur, Facies non adeo de ordinario recedit statu, Tormina præcesserunt circa umbilicum & lumborum dolor; ut ex *Hipp. S. 4. Aph. 11.* constat, dicent. Quibus Tormina ad sunt & circa umbilicum cruciatus, & lumborum dolor, qui neque medicamento, neque aliter solvatur, in Tympanitem firmatur; ructus & crepitus crebro prorumpunt, borborygmi & rugitus obmurmurant. Dyspnœa & sitis quoque hic dominium obtinent.

Prognosis: apud Vulgus Hydrops Tympanites ita malè audit ut eo affecti omnino insanabiles credantur. Reverà tamen hic morbus non sæpe per se interficit, & ni post tempus Hydropem Ascitem sibi faciat comitem. Si tympaniti accedat inflammatio umbilici vel alius ventris muscoli, tunc mors est in propinquo, legantur quæ circa explicationem casus nostri dicta sunt de Musculis abdominis. Item prognosis ex Ascite.

Tertia species est Anasarca, quæ ex inundatione aquarum serosarum in vasis lymphaticis & musculis peripheriæ corporis tumorem totius corporis præprimis circa palpebras oculorum producit.

Pars affecta est totus corporis habitus.

Diagnoscitur ex tumore laxo, molli & plerumque pallido totius corporis, omniumque ejus partium extremarum & digitorum impressorum remanent stigmata. Sitis non adeò urget. Respiratio est difficilis. Facies pallida.

Causa est collectio lymphæ in musculis partium externis, vel eorum vasis lymphaticis, quibus ruptis lymphæ in panniculum effunditur.

Anasarca facile cognoscitur, & reliquis speciebus facilius, cæteris paribus, quoque curatur. Degeneratur in Ascitem dicente *Hipp. Aph. 74. S. 7.* Albæ pituitæ aqua interclus superxerit. Illi qui ex nimia Sp. V. ingurgitatione Ascitici evadunt, plerumque primò Leucophlegmatici fiunt.

Ex mœrore Anasarcam ortam lethalem observavit Deckerus in virgine septuagenaria.

Hydrocephalus vel *ὕδρηνι Φαλόν* est Tumor Capitis aquosus seu Hydrops capitis & oritur ex inundatione aquarum serosarum collectarum inter cranium & musculos & cutem capitis, ubi ex restagnatione hujus humoris vitiosi vasa lymphatica obstruuntur, tandemque rumpuntur, hinc

ex novis subsequenter muscoli & cutis capitis in magnum extenduntur tumorem; Colligitur enim interdum tanta copia humoris, ut eo caput supra modum intumescat. Quandoque collectio fit inter cranium & cerebri membranas; quandoque Teste Aëtio inter cerebri substantiam & ejus membranas, sed quæ nullam recipiat curationem.

Morbus hic infantibus magis solemnus est quam adultis, quia infantibus tunicae arteriarum & lymphæ ductuum sunt molliores, atque pori tubulique angustiores, hinc quoque in utero materno infantes hunc morbum acquirere solent ex obstructione vasorum & impedita circulatione humorum, & deficienti insensibili transpiratione. Præsertim cum Infantis caput diu detineatur in aquis, quæ in utero sunt, quæ cerebrum aliasque partes capitis refrigerant, & sic hunc affectum generant. Distingvendum tamen est inter tumorem à sanguine extravasato productum, qui quandoque ob partus difficultatem & ob rudiorum in puerperio ab obstetrice factam operationem in infantibus recens natis in capite deprehenditur, & non pro Hydrocephalo habendum.

Pars affecta est caput & quidem quoad nervos & vasa lymphatica in eo perreptantia: hæc quatenus sint rupta, illi quatenus officia sua ritè peragere nesciant. Et quia serum seu lymphæ colligitur nunc in ipsa substantia cerebri, nunc inter ejus membranas & cranium, modo inter cranium & pericranium, item inter cutem & musculos capitis.

Signa Diagnostica quoque in Democriti puteo latent sepulta Imminentis Hydrocephali, nec nisi *επιχειρῶν* artificiali erui queunt; Si verò jam præsens fuerit hic affectus, tum faciliè in sensus incurrunt.

Tumor si adest mollis, ad digitorum contactum cedens, materia latet inter pericranium & cutem, sin inter cranium & cerebri membranam contineatur aqua, tumor ad tactum non est mollis, nisi valida fiat compressio, tum enim impulsus cedit, cum cranium infantum adhuc sit tenerius, & maximè futuris dilatatis.

Causa cum hydropis convenit, est enim ruptis vasis lymphaticis extravasatio lymphæ, quæ colligitur vel inter pericranium & musculos capitis, vel inter cerebrum & ejus membranas &c. lymphæ ductus enim diutius obstructi, quia valdè fragiles sunt, faciliè rumpuntur, & aquas suas exspuunt, quod Dn. *van Horne* P. P. Leidens. annotavit ex inspectione cadaveris pueri, in quo libras ferè 4. aquæ subsalsæ & lymphæ extraxit.

trahit. Lympha hæc ut plurimum colligitur in capite ob deficientem insensibilem transpirationem, nonnunquam ob impeditam urinæ excretionem, quale exemplum habet Clariss. & Doct. Dn. *Dolens* in sua Encyclopæd. chirurgica pag. 5. in filiâ unius anni, quam etiam feliciter diureticis pristinæ restituit sanitati.

A flatibus caput in molem extendi posse refert *Hildanus Cent. 3. Obs. 18.* de nequissimo quodam nebulone, qui in infante suo artificiosum scil. hydrocephalum fecit: nempe incidit cutem capitis circa verticem ad musculos usque foramine parvo, ac per illud ipsum ore (immissâ fistulâ) inflavit foramen cerâ aut simili aliqua materia obturavit, foramen enim eâ industria & adeo artificiose fecerat, ut possit obturari aptè, unde caput in maximam extendebatur molem. Infantuli hujus nefarii parentes hoc quæstus & lucri causa fecerunt, & eapropter Parisiis explorato scelere ambo morte mulctati fuerunt: sed hoc rarum est. Historiam hanc *Hildanus* testibus à quibus eam accepit confirmat, pag. 199.

Quoad prognosin, hic morbus periculo haud caret, ætas enim tennella est, quam ut plurimum occupat, huic oneri ferendo impar, & communiter succumbit, hinc omnes infantes hoc affectu laborantes mortuos se vidisse ingenuè fatetur *Ingrasius Tract. 1. C. 1. Comm. in Avicenn. de Tumor.* Confer *Sennert. L. 1. Prax. p. 1. cap. 28. Paran. 7. Operat. Chirurg. c. 1.* Malum signum est, si tumor quotidie increscit. Si lympha in ipsa cerebri penetralia decumbat, de restitutione conclamatum esse omnium Medicorum fert sententia. Si circa nucham lympha dominatur, obstructionis spinalis medullæ metus est. Aliquando totam capitis peripheriam occupat, & tunc multa in recessu vitæ discrimina habet; quandoque dimidiam capitis regionem, ut *N. Tulpius* profert *Obs. Medic. l. 1. c. 25.*

Quod hæc aqua in ventriculis cerebri sæpè contenta non efficiat apoplexiam, epileps. &c. ratio est, quod non subito, sed sensim in cerebro colligatur. Sin verò supervenerint Apoplex. Epilep. Lethargus &c. non fallaces sunt mortis prodromi.

Sanguis è naribus stillans indicat serum esse valde acre, quod vasa corrodit. Hic affectus aliquando brevi curatur, nonnunquam etiam non citò absolvitur.

Hydrops pectoris eandem habet originem cum Ascite, rumpuntur enim vasa lymphatica, quæ in cavitate thoracis reperiuntur, à nimis col-

lectis aquis serosis; hinc fit extravasatio lymphæ serosæ & consequenter inundatio in Cavitate Thoracis.

Totum Genus nervosum & venosum in hoc morbo laborat primario, secundario verò Thorax & in hoc contenta, quorum vasa lymphatica rupta lympham stillant.

Differt ab Empyemate, quod est collectio puris in cavitate thoracis; Hic affectus autem collectio materiæ aquosæ, serosæ.

Ex eodem fonte cum Ascite profilit, quapropter quoque eodem adsunt phœnomena: ut fluctuatio aquarum in Thorace, Tussis Sicca, Dyspnœa præcipue inter ascendendum, sitis, febris lenta, hypochondria utrinque tumida, palpebræ inferiores inflatæ, noctu post primum somnum magna inquietudo & jactatio, pedes tument, aliquando etiam scrotum, pulsus inæqualis & perturbatus; accedit quandoque cordis palpitatio & crebra animi deliquia. Quorum omnium explicationes facile ab Ascite hydropes peti possunt.

Affectus hic difficilis est curatu & tandem transit in Asciten. Raro quoque occurrit.

Uteri Hydrops est collectio aquosa subinde in ipsa Uteri substantia, subinde inter membranas ejus, rarius in ipsa cavitate. Ingentem Uteri Hydropem in Tubis observavit Celeberr. D. *Munniks* Professor Ultrajectinus.

Hic affectus difficile cognoscitur, propterea quod uterus aliis humoribus crassioribus laborans, eadem ferè patitur symptomata & signa, imò soepè hic affectus ab imprægnatione difficulter internoscitur.

Causas easdem ferè habet ac Tympanites & Ascites, quæ consuli possunt. Difficile quoque uti omnes reliquæ hydropis species curatur.

Cura.

Breviter descriptâ Hydropis, histotiâ necesse est ut & ad Præsidia quæ nos ab hoc hoste liberare possunt, nos convertamur. Antequam autem hæc adducamus, pauca quædam de vera Medici veri cognitione, & quanam Medici non solum ad hunc hostem debellandum, sed etiam ceteros ad morbos curandos admittendi sint, instituamus.

Ad ve-

Ad veram Medici veri cognitionem quod attinet, ille non cognoscitur quatenus habet magnum nomen famamque magnam: Quæ quidem, si una cum aliis necessariis requisitis adsint, non negligenda sunt. Sed quatenus simul & quidem secundum legem Hippocratis Magni illius Legislatoris Medici, Natura, Doctrina, Loco studiis apto, institutione à puero, studio & industria, atque tempore natus fuit. Illud enim solum non facit Medicum verum juxta Coum magnum dicentem. Medici fama & nomine multi, re autem & opere valde pauci reperiuntur. Sic hinc inde magnum nomen, quamvis ab ignorantibus & idiotis, sibi acquisiverunt Tonsores, Balneatores, Aromatarii, Sepiasarii, Circulatores &c. imò & studiosi Theologiæ semiscioli, cujus generis species quædam & mihi patet, non erubescens officium desiderare Physicum. Titulumque promoti Doctoris, qui tamen nunquam fieri potest. Qui quidem à Doctiss. Dn. Paulo Zach. in suis quæstionibus legalibus pag. m. 371 quoque Medici vocuntur, sed latè, h. e. inter fictos & medicastro eos numerat. De his & videatur Ripa tractat de parte part. nlt. parhi 2. No. 3. Item Galenus in Lib. ad Thrasib. cap. 24. Aliique Hippoc. eos personis mutis in tragœdiis similes esse non inficiatur &c.

Ex his patet Medicum verum non cognosci sola fama cæca & quatenus à variis Idiotis commendatur; sed re ipsa, ut aliquis Medicus sit, requirit Hippocrates, h. e. morborum horumque signorum, imò omnium Medicinæ partium accuratam & sufficientem habeat cognitionem.

Quæres, unde hæc cognitio fluat? Resp. cum Hipp. è Doctrina, h. e. ex informatione cujusdam fidelis & docti Professoris Medicinæ. Ubi verò hæc doctrina acquiratur? In loco studiis apto, h. e. in Universitate aliqua, ubi est confluxus multorum Virorum doctorum. Doctrina autem hæc non citò per aliquot septimanas, uti Methodicis placuit, qui Herculis cothurnos puerorum pedibus applicare volebant, acquiritur; sed per tempus debitum, studium enim medicum latissimum est, & multum requiritur tempus ad hoc excolendum, si postea in arte sua quidam perfectus esse velit Medicus.

Quærere hic vales, an illi, qui vulgò veteres quasi Practici vocantur, in aliquorum morborum cura fortunam aliquando habuerunt, attamen demonstrare non possunt, ubi hanc artem addidicerunt, multò minus de hac arte seu scientia testimonia ab universitatibus proferre possunt,

sunt, officio Physici in aliqua Republ. uti ille Medicaſter in noſtra præſtatione fungi poſſint, ipſiſque promotis Doctoribus præferendi ſint? Ego ut fidelis & pius Medicus, cui incumbit, ne in die Judicii coram Divina facie cum illis, quos DEus unâ mecum ad munus hocce vocavit, qui in ſumma hac rerum confuſione, perturbatione & inverſione tacuerunt, & obmutuerunt, malè ſubiſterem, & ipſi Judices à me vindictam petierint, ignorantiamque prætenderint, ut honorem, dignitatem, ac famam artis meæ, cujus Autor ipſe DEus tuear & promoveam, reſpondeo: nequaquam admitti poſſe neque ad officium phyſicum, neque ad honores Doctoribus promotis debite exhibendos. Quicumque enim deſiderat officium & locum phyſicum, præſertim in honeſta aliqua Republ. aut Civitate, ille neceſſe veris, debitis & legitimis ab univerſitate quadam adeptis testimoniis ſit illuſtratus, ut his demonſtrare poſſit an habilis, idoneus ac aptus ſit, hoc officio fungi; Quicumque verò non poteſt per legitima univerſitatum testimonia ſuam aptitudinem demonſtrare, illi etiam talia officia non poſſunt offerri, quamvis à vulgo haberet nomen fortunatiſſimi, vulgus enim ſine ratione judicat, ridiculum etiam coram orbe erudito eſſet Medicos fictos ſine doctrina ad officia evehere Archiattrica quæ nobiliſſima ſunt, Margaritæ enim ſuiſus non ſunt projiciendæ. Prætereà huc referendum eſt illud Sperlingianum: Ubi multum fortunæ ibi parum intellectus & prudentiæ. Et in medico laudare fortunam eſt medici accuſare ignorantiam.

Objicies: tamen multis in locis reperiri Medicos fictos, Carnifices, Circumforaneos, Bullatos ſeu bulla inſignitos, veſicarios, qui frequentiore habent praxin, quam Promoti Doctores, quod tamen hi non mutare valent. Reſpond. Reſ eſt quæ magis deploranda quam corrigenda, quia ex lenitate Magiſtratus provenit. Nam ſi Ampliſſ. Magiſtratus ubique ſubditorum ſalutem, æquè ac illi curaret, reverà tot imperitos homines, pseudochymicaſtros, circumforaneos, impios carnifices, & hujus farinae nefarios homines, neque arte, neque experientia valentes non ſolum non admitteret, ſed merito ejusmodi homicidas ſupplicio afficeret. Sed quam procul eſt à ſcopo; tanta enim farrago illorum Medicaſtrorum his temporibus eſt, ut merito deploranda ſit conditio artis medicæ in ſeipſa & in ſua ſpecie, & ſingularis doni à DEO hominibus conceſſi, quod à tot flagellis conſpurcetur. Ex omnibus enim vitæ ſtationibus etiam deſperatis.

ratisissimi quique quorum pro fligatissima vita est in campos Medicinæ audacissimè insiliunt, & juxta illud:

Fingunt se Medicos, quivis Idiota, Sacerdos.

*Judeus, - - - Histrio, Rasor, Annus,
Miles, Mercator, Cerdo, Nutrix & Arator. Et*

*Ambubajarum collegia, Pharmacopola,
Rastricola, Molitor, Pistor, Agaso, Faber.*

Quin etiam Carnifices &c.

Quia verò Mundus decipi vult, decipiatur Ergò.

Hoc autem admirandum, quando tales impudentes Annetestes in aliquo loco reperiuntur, qui, etsi rationes studiorum suorum reddere nesciant, nec unquam demonstraverint, an scientiam suam legitime impetraverint, majoribus quam par est honoribus affici desiderant, imò officio Physici fungi contendunt.

Ex his facile colligendum, quod vera veri Medici cognitio non consistat in sola magna fama, magno nomine, magnaque praxi exclusâ scientia vera, informatione à puero in loco debito, testimonio seu privilegio doctorali atque doctrina; sed quatenus conjunctim in subjecto erudito reperiuntur, & re vera insunt.

Ad Medicum quod attinet, talis eligendus est, qui judicio bono præditus & propter sua studia ab universitatibus cuivis desideranti reddere scit rationes: h. e. Rationales ac Medici Academici ad hunc, aliosque morbos curandos eligendi sunt, præsertim si Æger in ultimis vitæ suæ horis animam suam bona cum conscientia Creatori suo reddere velit. Omnium autem rerum Creator est DEUS sed ordinis, non confusionis, hinc quoque vult ut omnia in communi hominum vita secundum ordinem tractentur, &c. Unde ab eo semper tales Medici vocantur, qui juxta Divinum senem sibi verè scientiam Medicinæ comparaverunt, scilicet, qui nisi fuerunt Natura, Doctrina, Loco studiis apto, institutione à puero, studio & industria, atque tempore. Et hi à Deo vocantur, hi etiam per Professores Medicinæ Academicos (non per privatos Homines, scil. per Notarios Stadt-Schreiber) approbantur, & ad culmen per gradus (non absque his) in sua scientia evolvuntur. Nam

Scandere Parnasi culmen, res plena laboris.

Nec datur ad Musas currere plana via.

Hos quoque sacra Scriptura jubet honorare *Syrac. cap. 38. v. 1.* Hi que & officio Physico fungi instructi sunt. Hoc *Augustus Cæsar* observavit, qui *Antonio Musæ* Medico non ficto, sed rationali, universoque Medicorum dogmaticorum ordini jus annulorum aureorum, multamque immunitatem concessit. Et ut *Plinius* testatur, Romani Cæsares, qui Medicis non fictis non e Theologia in Medicam artem irruentibus, sed rationalibus 250 sestertia pro annuo solario numerarunt.

Ex his sat superflue patet, Medica stros omnes tanquam Diabolum fugere, e contra se in manus Medicorum à Deo vocatorum committere, si bonos verosque tam corporis quam animæ nostræ curatores esse velimus. Hinc dico. Quicumque non est Medicus doctus, ille neque honorandus, neque ad morbos curandos admittendus, atqui Noster *Balthasar* non est doctus. E non est. &c. Item quilibet Doctor est honorandus, atqui Noster *Balthasar* non est Doctor. E. non. &c.

Plura adducenda quidem essent, sed ut brevitati studeam, me converto ad præsidia, quibus nostrum hostem scil. hydropem debellari possimus.

Præsidia hæc juxta consuetudinem assumptam e tribus fontibus peti possunt: scil. Chirurgico, Pharmaceutico & Diætetico.

In Chirurgia nobis varia proponuntur, inter quæ Venæsectio à variis Practicis laudatur: sed quia in principio totus sanguis non infectus est, neque illa pars infecta illuc duci potest, ubi possit extrahi; Item in consummato totus sanguis totumque genus nervosum infectum, periculosum esset sanguinem extrahere. Nos hanc cæterasque operationes tanquam nihil valentes, relinquimus. Παρεκκίνησις aliquando institui potest, si Ager adhuc validus est, & sustinere potest, nam viribus prostratis successum nunquam pro voto experieris. Quæ *Hildanus* de παρεκκίνησι Cent. 1. Obs. 48. pag. 43. Cent. 4. Obs. 42. p. 320. Cent. 1. Obs. 47. p. 42. Cent. 2. Obs. 58. p. 133. &c. Aliique scripserunt inter rarò feliciter successa annumeranda sunt. Quapropter necesse est, ut præsidia in fonte Pharmaceutico & Diætetico quæramus.

In fonte Pharmaceutico multa numerantur remedia, quæ hinc inde à variis Practicis laudantur. Pauca vero mihi sufficiunt, & quidem quæ vim habent virtuales aperiendi, educendi & confortandi. Inter hæc aperiencia sola sufficit Camphora, & Medicamenta absque camphora in hydropse adhibita ferè nihil efficiunt. Camphora enim mirabiliter aperit, mani-

manifestè autem, non occultè. Nam substantiam habet Oleosa Spirituosa; quæ, nisi cicuretur aliqua materia oleo gaudenti fixo, intra aliquot horarum spatium consumitur & evanescit. Id, quod testari possunt Pharmacopœi aliiqve Aromatarii seu Materialistæ, qui Camphoram conservant vel Piperem, vel sem. Lini, aliisque his æqualibus speciebus. Hinc Camphora ubiqve poros in humano corpore à materia viscida & glutinosa obstructos aperit vi sua penetranti; ita ut postea reliqua medicamenta eò meliùs, feliciùs & citiùs agere possint.

Ad educientia spectant purgantia, sudorifera & diuretica. Ego solâ resinâ Jalappæ cum cremore Tartari addito pauculo Camphoræ usus sum. e. g. sit formula purgantis: R. Resin. Galapp. gr. iv. Cremor. Tartar. ℥. Camphoræ gr. v. M. add. Ol. Cinam. vel alio Oleo dist. confort. gt. i. atque alteram. f. purgans. quod in variis adultis 20. operationes excitavit.

Inter sudorifera præstantiora sunt Antimon. Diaph. Crocus, Corn. C. 5. Δ. Bezoartica quævis, sal fixum quodvis & Olea dest. Quæ quidem omnia uti & purgantia juxta naturam & sexum variorum subjectorum disponenda sunt sit formula R. Antimon. Diaphor. 3℥. C. C. s. Δ. 3℥. Θ. Absynth. gr. xv. Camph. gr. vi. Ol. dist. Macis. gt. ii. M. f. pulv. D. S. *Schweißpulverl.*

Diuretica sint Allium, Scordium, Cæpa, Nitrosa, Olea dest. Θia volatililia &c. Omnia autem cum camphora permiscenda sunt. Decocta, Destillata, pulveres ex his dictis parari possunt; sit in qua forma æger libentius assumat.

Confortant cum aliis Pulveres cordiales, e. g. Bezoart Sennert, Cord. Dornic. aliiqve. Vinum absynthiacum &c.

Balnea sicca multum præstant, si debito tempore adhibentur & æger sustinere valet.

Cura Diætetica consistit in his ut Ægrotus maximè se abstineat à potu, quæ vel sola curavit. Unde valet sequens: Abstine & efficies, quod medicina nequit. Quieti non adeo indulgeat, sed si adhuc vires adsint, magis motui se exponat. Excernenda excernat, & ab omnibus animi pathematibus procul sit.

Regulæ sequentes ultimò addendæ sint, ut: Hydropici naturam inferendis catharticis & sudori feris ritè explorare, potior curationis pars est.

Omnia externa pro fūco habenda, solo excepto Spir. Juniperi & sp. Vin. ♀ sato.

Nocent Unguenta aliaque pingua, hinc quoque illud quod noster Medicaſter cuidam Reverendiſſimo applicavit.

Fortuna audacem juvat, timidumque deſerit; ea propter valere quandoque poſeſt tonſorum proverbium: *Frifch gewagt / iſt halb gewonnen.*

Vulgaria plus præſtant.

Lento gradu progreſſus Morbus difficilius curatur, quam qui citò fit, ut & qui aliis ſupervenire ſolet morbi.

Servi quia facilius quam liberi ad abſtinentiam nocivorum cogi poſſunt, facilius quoque curantur.

Omnia acida, falſa, viſcida, glutinoſa, Lacticinia leguminoſa, flatulenta nocent; quia obſtructiones ad augent.

Aër autumnalis, nebuloſus & frigidus atro notandus carbone.

Aſſata elixis præferenda, hæc humores cumulant, illa aſſumunt.

Post vehementem motum ſubita refrigeratio valdè nocet, quia idem viſceribus fit, quod fieri ſolet ferro ignito frigidis immerſo, h. e. obſtructiones & inflammationes fiunt.

Somnus nocturnus oonducit.

Opiata nocent, quia obſtructiones augent.

Plura quicunqve deſiderat, plura paſſim apud Autores reperiet, Nos brevitati ſtuduimus, tamen ut quivis remedia contra hunc morbum graviffimum invenerit probatiſſima & ſecuriſſima.

SOLI DEO GLORIA.

ERRATA, quæ corrigi poſſunt.

P. 11. l. 3. lege *Tympanites*. P. 12. l. 30. leg. *Et hæc*. p. 14. l. 9. l. *nis* pro *nes*. ead. l. 33. l. *Chylumque* per. p. 15. l. 10. l. *jure æquiſſ.* p. 16. l. 3. *trunſlatus*. ead. l. 23. lege. *reliquæ*. l. ult. dele *comraa* inter *cratſus* & *nimis* p. 21. l. 12. l. *circulatione*. p. 28. l. 4. l. *aerem externum*. p. 29. l. 22. l. *citiuſ.* p. 30. l. ult. *mala*. p. 32. l. 24. lege. *morbo diuturno*. l. 31. l. *diſtendum*. p. 33. l. 5. leg. *Archiater*. p. 35. l. 2. leg. *ulcuſ*. p. 39. l. 29. leg. *ſupervenit*.